


宋學士全集
一二





宋學士全集

(二十)

J
17.8

1.2/21

宋 濂 撰

宋學士全集卷之二十一

墓誌銘

故江東僉憲鄭君墓誌銘

奉訓大夫僉江東建康道肅政廉訪司事鄭君。以辛丑之歲夏五月十又六日卒於杭之寓舍。江浙行省左丞相帖穆爾達識公深用痛惻。命左右司都事錢君用壬暨僉事君八都來治喪事。秋八月十又一日。權厝城西七寶山。後五年丙午冬十二月二十四日。還葬義烏石斛山。其弟淇始請從兄承務郎温州路總管府經歷泳評隲諸行成書。而授前史官宋濂請刻其墓碑曰。君諱深。字仲幾。一字浚常。鄭其姓也。其先從睦來遷婺之浦江。自建炎以迄于今。同居者十世。朝廷旌爲義門。曾大父德池。大父文泰。文泰本青田尉。德璋子。出爲德池後。德璋與兄德珪罹難。爭欲就死。其事詳見宋史。孝義傳中。父銳。累贈奉訓大夫。樞密院判官。驍騎尉。追封浦江縣子。母樓氏。累封浦江縣太君。君幼知讀書。務了大義。不能泥章句。然負氣不羈。嘗往外氏。有以童視君者。君不平。出奇計給之。日者以六物推君休祥。言君必凶於其家。君恐祖父聞之。或薄其愛。大惡之。居亡何。他日者又至。君迎謂曰。我某年月日生也。子幸譽我。吾當厚報子。否則戒悍奴辱子矣。聞者皆大驚。稍長。氣益振。見部使者行縣。騶從甚都。君歎曰。吾非夫也哉。孰云異日不如之也。人斥其誕。獨從父欽奇之。使遊學京師。久之。會丞相別兒怯不花公出鎮南服。命君從行。杭城災連。

數萬家。丞相趣吏具文書以聞。君爭曰：「杭民無恆產。若候報下賑之。則已大半爲鬼矣。汲黯發廩。此非其時乎？」丞相悅。令戶賑之。君曰：「戶有小大。必計口乃宜耳。」丞相從之。俄辟君行宣政院宣使。未及就。丞相入中書。君復從行。丞相多君。欲用爲宣使。俾理問官。咬住召君。咬住將別有所薦。不白以丞相意。卒然問曰：「儒者可爲行人之職乎？」君曰：「不可。」咬住反命。謂君不屑就。丞相怒而止。君知爲咬住所賣。不復辨。聞太師脫脫公喜士。卽走見之。時太師新解機務。退居於豐。謁入與語。大悅。遂留之。君乘閒問曰：「蘆蕩之利。宜與江淮萬姓同之。閣下專焉。無乃不可乎？」太師曰：「向者之利。悉歸豪右。今歲入不過什二。餘皆編民物。何云專邪？」君見太師語堅。不敢強。他日太師復自言。意若怒君失辭者。君從容曰：「在至元閒。魯王嘗取之矣。上以其病民。罷之。且詔羣臣不得奏請。閣下今復繼焉。或者其違制書乎？」太師笑曰：「吾業已奏辭。恐君言中變。姑試君耳。」於是謂其子哈刺章曰：「鄭先生有道之士也。爾往事之。君教以書詩。得師道甚。太師稱譽弗置口。至有聞於上者。初。皇太子鞠育太師家。與哈刺章同臥起。至是有旨欲使之共學。君力謝曰：「輔導皇太子。歷代自有故事。今若苟而行之。是取譏於天下後世也。」太師入奏如君言。上曰：「朕言已出。必使一至卿家而返。」明日。皇太子至。君以孝經進。喜見顏色。因錫錦衣一襲。明年。太師以頌言出居西寧。以哈刺章託君。時訛言沸騰。或促君亟去。不去。禍且及。君曰：「人以孤託我。而中道棄之。不義孰甚焉。且死生命也。吾何所避。弗聽。」丞相舊與太師有微隙。又怒君不爲宣使。而客太師家。將罪君。復憐君才。不忍發。乃遣人鉤致君。君曰：「丞相遇我厚。我寧弗知之。其去也。特爲理問所閒爾。今丞相幸用我。然受人託而違背之。何以

事丞相爲丞相義之。真不問。又明年。太師還朝。開太傅府。奏君爲長史。階從事郎。時至正八年秋八月也。九年。太師復拜右丞相。叩君以民所最病事。君曰。皇慶初。國用不足。令民入貨取券。使受直於有司。踰三十年。弗償。非惟民困欲死。國家之信。將何在焉。太師卽勒吏使給之鈔。以緡計者八百五十萬。有奇。國子監所設管勾學正。司樂之屬。舊以監中諸生積分未貢者充。薦者多濫。有俟二十年之久者。廷議患其弊。復以諸生試禮部下第者。別選爲次。榜補之。斥去已薦者四十人。蕭熙、黃模等號訴於太師。太師以示君。君曰。法弊固當更。然守以歲月。一旦斥去。亦失物情。若二者交參用之。盡於所薦而止。斯善矣。太師奏行之。太師在西寧時。門下客盡散。無敢履其庭者。獨王架閣梅時過之。君因數道其賢。太師曰。梅屢短君。而君反賢之。何也。君曰。賢之者。以其知義爾。若深所短。梅正當言之。能言之。所以爲益賢也。太師欲選御史。君又薦梅可用。太師以君爲長者。鄉先達爲臺臣所糾。奪其誥命。君言於太師。復之。及其來京師。頗用人。閒。將風御史劾君。君略不爲動。亦不自明。未幾。其子以廕入官。君復白太師。擢爲崇文丞。始大媿歎。以爲不可及。十年春三月。遷宣文閣授經郎。階徵仕郎。召見明仁殿。上顧資政院使朵爾只班曰。此哈刺章師也。教法肅甚。朕今陞入宮庠矣。俄中書奏君兼經筵譯文官。君敷釋聖經。啓沃深切。上每爲之改容。宣文在禁中。密邇端本堂。日侍皇太子研席。寵遇殊甚。嘗問君家同居事。屢歎以爲嘉瑞。書麟鳳二字美之。十四年夏四月。轉宣文閣鑒書博士。階儒林郎。兼官如故。上見君久。益器之。以新刻智永千文。識以宣文閣寶賜焉。君侍經帷。教胄子者凡四載。歲錫燕者再。頒金織紋幣者二。皆有副。扈從上京。又予楮幣二千五

百緡率以爲常。當是時，君從弟國子助教濤，方爲經筵檢討，權參贊官，每進講殿中，兄弟連翩而入，及退，均被上尊馬潼之賜，人尤以爲榮耀焉。秋七月，改中書吏部員外郎，吏部月有選，鄂縣丞張鼎，年六十七，吏以官期三年白，君曰：使如汝言，當致其事矣。何須入銓選？卽上之闕畀之。後著爲例。董甲，雲南木邦人，以任子當官，貧不能賄，吏遂以戶冊有異，移符審之。君曰：京師距雲南萬里，公牘往來，動經一二載，且其先人嘗官於朝，豈無可稽者邪？下架閣吏閱籍而注之。永新尹趙太訥，上休致之請，時新例必經廉訪使者覆按，而趙竟失之。吏以爲難，君問例始何時？吏以九年四月十七日對。君曰：趙之謝事，乃是月二十一日。永新僻在大江之西，五日之間，其能知有詔乎？宜以例前行之。同舍生先入仕籍，見君未達，頗使酒廷辱君，君心甚銜之。及是，改官之文適至，君曰：彼積勞日久，豈可以私憾而廢公法哉？命擇良郡官之。徐人周令尹家陷於寇，獨周以智免。及太師統兵平徐，其女掠入太師驕奴家，使之主汲，力不任，數欲赴井死。周物色知之，不敢言。君將聞於太師，人曰：國家以徐叛殲之，君言不脫吻，而禍及其踵矣。君弗顧，卒白還周。九月，君以分部從太師征高郵，至嶧州，見民東西竄，君追問之，民曰：軍奪民牛，且擊翁嫗傷，故逃耳。君曰：王師除暴禁亂，乃令侵民耶？吾若不言，孰當言者？急蹤跡之，獲樞密院吏王丙，執詣太師，寘於法。冬十二月，太師以讒去。君曰：天下自此多故矣。遂移病弗視事。十六年秋八月，御史臺欲用君爲御史，君以母夫人年高辭，已而除君僉江南浙西道肅政廉訪司事，而中書同日奏君江西行中書省左右司郎中，臺臣覆奏乃止。君急欲南歸，卽入謝上皇，太子聞之，將留弗遣。君對以其故，復賜眉壽二大字。君持歸以爲

親榮時中原道不通。君浮海而還。至萊州洋。遇颶風。擊旅舶壞。深目而髻者六十人。望君舟而號曰。曷生我主舟者。曰。此泉南回紇氏。精悍且持兵。不殺將爲亂。言人人同。君方屈羣議。斂其兵刃而飯之。暨升岸。羅拜去。浙西時屯重兵。挾貓獠軍勢。強仆人廬舍以爲薪。上下惴惴。莫敢何問。君反接鞠訊。知隸平章政事慶童公帳下。械送而請治之。軍因不敢譁。譯史桑葛。憑藉憲使之威。視僉事忽都不花如無人。僉事欲黜之。恐激怒其長。乃自引退。譯史愈鷓張無忌。君勅之。憲使持不下。君怒曰。彼且不有僉事。何有於公哉。叱出之。憲使慚。其庭中人以事誣君。上行御史臺。時平章爲御史大夫。罵曰。鄭僉事剛介之士。吾熟知之。爾固不能容也。擲其文於地。事遂寢。尋除今官。未及上卒。年甫四十有八。娶同里周氏。累封浦江縣君。繼室義烏吳氏。東平王氏。封恭人。皆先君卒。無子。少房高麗康氏。生女曰琴。未行。今以弟之子某爲君嗣。君眉目疎豁。軀幹魁梧。雖沈敏多智數。秉心慈恕。而壹以正裁之。人未出言。已能窺測其肺腸。故周旋南北。閒鮮有債事。然頗以師道自任。授經宣文閣中。皆勳戚大臣之子。君戴星而出。戴星而入。孜孜以開物成務。日迪導之。學成而仕。蔚爲名臣。與人交。不以勢之崇庳而貳其心。在朝公侯卿大夫。亡慮數百人。無不知敬愛君。而翰林侍講學士豫章揭公侯斯。翰林學士承旨瀏陽歐陽公元。太子右諭德東明李公好文。司農少卿臨川危公素。尤與君爲文墨交。而無閒者也。若君者。可謂奇偉不凡之士矣。濂長君僅四歲。負笈遊立夫吳先生之門。始獲與交。君晝同食。夜則共衾。稠而寢。穆穆然。衍衍然。其姓雖殊。情實兄弟也。君嘗指時之聞人謂濂曰。某也操寸管。入位館閣。某也垂紳正笏。立廟朝而弼成化功。鄭生長雖不滿六尺。

行見錚錚然鳴矣。濂見君言，夸出峻辭，戲君反覆相撐拄不已。君益騁奇辨，是非蜂起。且曰：子未可少吾。後當然已，而果然。嗚呼！君今已矣，其不隨世磨滅者，猶耿耿而在。是亦足矣。濂幸後死，因悼君行而揭之，以見有志之士其事終成，且告修郡乘者錄焉。銘曰：

劍解夫撓，如龍蜿蜒。風雲會之，飛騰上天。顯允鄭君，才實類此。利器在躬，不試焉俟。嚴嚴師臣，四國是瞻。佐其戎勳，唯君則堪。民生瘡痍，我是用悼。朝政糝糠，我寧不告。當寧聞之，召入宮庠。日照月臨，承其龍光。廣廈細氈，從容論道。載啓載沃，有勤無惰。其勤謂何？堯舜吾君。八荒熙然，期囿至仁。天子曰：於爾學之博，宜鑒朕書。弘宣文鐸，省臣交薦。贊治銓曹，水清衡平。物無遁逃，出將使指。繡衣赫艷，嚴霜夏零。邪草不植，凡人賦材。此盈彼虧，若君之爲。無適匪宜，豈非義風。淪肌浹髓，大本旣立。孰踰其軌？君器則弘，功業可馴。如持右券，責報於人。烏臺鳳池，遲君遊衍。泉臺莫晨，有淚雙泣。誰謂君亡？視之若存。清風凜然，施及後昆。烏傷之西，溪石如斛。石或可磨，君名不沒。叶 同門友金華宋濂文。

本朝浦江翼右副元帥蔣公墓誌銘

君生於元之大德戊戌十二月丁丑。於明洪武二年己酉十有二月乙亥卒於家，壽七十二。卜是月乙酉葬於通化鄉長富之源。其子璿奉里人陳洸所爲狀來謁銘，乃敘其世次與出處之大方而系之曰：君姓蔣，諱鏞，字可大。其先湖之安吉人。唐末自始祖守善來遷於婺之浦江。其子德勛顯爲洪撫、交、三州刺史，皆有德於民。自宋南渡，有諱廷俊者，宜教郎君之七世祖也。有子五人，俱登仕版。鄉人榮之。君之曾大父

吉京學登俊。齋諭大父自祐。早世不顯。父穎有潛德。以行義服鄉里。君自少長。豪縱不羈。喜結賓客。嘗慷慨曰。大丈夫不能致君於朝廷之上。則當封侯於萬里外。否則睦宗族。安鄉里。稱爲良善人。亦足矣。時人未之許也。及元之季也。天下兵動。且二十年。而吾邦聯貫閩浙山川。相繆烽燹之焰。燭於天。所至焚蕩爲墟。屠戮居民。殆無噍類。方是時。君以七子有奮身之勇。與鄉人保聚嵩山。境內怙之。老幼妻孥。煦嫗相養。居室雞犬無恙。如平時。遊卒抄擄。相戒引去。不敢犯。曰。嵩山有蔣君。蓋其畏憚。有如此者。及值聖朝。廓清海宇。天子躬擐甲冑。親征南抵於闐谿。卽以檄召君。及詣轅門。天子勞問洽至。愛其才。厚賞之。惜其年。曰。卿老矣。大將樞密院僉院胡公薦之。俾逐突寇。常昌軍於義烏。君率義兵數萬人。大破之。殲其渠帥。梟首及獲俘。誠以獻。上嘉之。與之符章。爲浦江翼右副元帥。攝分關事。以治浦江。軍肅民安。明年。樞密院總其事。伐越。得諸唾。又命移鎮諸暨。與樞密院判官爲裨將。又明年。君以老告。胡公爲請於朝。以職授其子斌。君旣歸。遂休養田廬。與鄉人父老。還往里閭間。恂恂若無能言者。故感戴之。曰。是有德於我者。及是又十年。竟以微疾談笑而卒。非豪傑士哉。娶郡城陳氏。有子七人。璋。琮。瑛。瑒。瑗。理。皆有室。女一人。璉。適蘭谿陳寧道。孫男一十八人。銘曰。

桓桓蔣公。萬夫之雄。壯年有志。齋而未逢。其人開天。龍飛雲從。進而知退。不居其功。佚老鄉邦。克永令終。長富新阡。山氣鬱葱。千歲而下。人曰。是爲蔣君之宮。翰林學士承旨中奉大夫知制誥兼修國史兼太子贊善大夫宋濂撰。

元故翰林特制朝散大夫致仕雷府君墓誌銘

府君諱機。字子樞。姓雷氏。其先出萬春之後。傳至五代時。有諱鸞者。由光州固始遷建寧之建安。曾大父時。宋太學內舍生。大父龍濟。鄉貢進士。當宋之亡。帥義師抗元兵。遂歿於難。父德潤。入元爲福州路儒學教授。積學庠之餘。買田三百餘畝。以給貧士昏喪老疾者。號義士莊。人爲建祠學宮。改將仕郎。福州路長樂縣主簿。未上。卒。後以子貴。贈朝散大夫。祕書少監。母游夫人。贈建安郡君。夫人善書而有文。無子。默禱於神。夢黑熊行天。遂有娠。及生。府君穎悟異恆兒。九歲能詩賦。十歲。九經皆成誦。十二。著明經解題。十七。試論郡庠。選爲第一。二十。受大官薦。爲邵武縣學教諭。二十五。登延祐戊午進士第。授福州路古田縣丞。自詔行科目。閩人擢第者。從府君始。未幾。丁朝散公憂。服除。遷延平路總管府知事。沙縣陳氏。豐於財。身沒而子幼。族有強暴者。欲據其業。賄於上下。訟久弗能定。府君下他廉吏鞠之。竟白其事。時經歷司獄二司暨照磨所皆闕官。府君攝其印。印置西樓几上。夜有靈龜尾如鼠。潛伏几下不動。若護之者。浹旬始不見。或以爲瑞應。改邵武路總管府經歷。郡長官乃西域人。恃與憲部有連。其猛若虎。與守議。稍不合。遽引杖擊之。守俯首遁去。府君獨不爲屈。每曰。苟如此。天子法將何在。獄有不平。抱案與之庭辯。辭順理直。雖怒形於色。不敢沮調。興化路興化縣尹。有豪大姓數家。陰持公府短長。挾勢以戕民。府君曰。此猶苗之有腫。不去。苗將槁矣。悉置於法。燭見毫髮無遁情。皆以雷神稱之。閩閩之衢。整以如卵小石。塋確不可行。府君令謀浮屠鑿石爲版易之。人呼爲雷公路。先是賦役屢不均。府君察知之。率吏民焚香祝天曰。爲民定

賦當以公有徇私撓法者。神降酷罰無恕。言已。令民自實田。隨其高下爲定。日選一吏主其官書。每一鄉畢。具其姓氏。揭之。民大悅。仙遊、莆田二縣民訴於郡曰。民苦賦不平者久。願乞我雷侯錄事司之。民又訴於郡曰。非雷侯不足以平吾民之役。晝假之。郡檄府君行。凡三辭乃往。民皆大悅。舉手加額曰。雷侯其豈弟君子矣乎。游夫人嬰微疾。府君聞之。愀然不寧曰。先君歿。不得在左右。致抱終天之恨。母年耄矣。忍廢好爵而不歸養乎。卽日抗章辭職。民涕泣留之。不從。羅拜馬前而去。歸僅五月。丁游夫人憂。服闋。轉湖廣等處儒學副提舉。府君招徠弟子員。羅知名之士。相與迪導之。月書季考。具有成法。文風爲之一振。擢延平路總管府推官。順昌舟師因利覆舟。取人財。獄成。父子皆坐死。府君以子從父命。白部使者杖遣之。尤溪有死獄。株連者二十五人。累歲不得釋。府君推罪之輕重。亦杖遣之。囚至感泣。相聚僧坊。誦佛書以爲報。沙縣織工子與張甲鬪。鬪散。子失足墮塹死。吏入甲故殺罪。府君出之。南平浮屠殺其主寺僧。浮屠之徒方九齡。官以知情論死。會朝廷遣使者宣撫入閩。府君力言其非辜。竟得釋。府君惠民不知教。建義學。鐔津延鄉貢進士陳竑願。開之以五倫之學。久之。士有與鄉薦者。羅天凌寇汀州。汀境與屬邑尤溪接。府君立堡柵數區。以扼其險要。招集強丁爲禦守。刁斗之聲。達旦不絕。盜聞不敢犯。陸泉州路惠安縣尹。惠安之民嗜勢利。而少禮讓。府君究心學校。欲以變其俗。兼立社學十所。俾分教之。縣西登科岩。先賢盧瞻故宅也。舊因宅爲祠。已廢。府君爲新之。使民知所勸。先是公田之入。每斛收錢百緡。民大病。府君旣至。減其直之半。居三歲。政通人和。遂爲諸邑之最。部使者及良二千石。爭賓禮之。或刻薦於朝。及代還。民悵悵。

若有所失。走大府遮留者。日以千數。不可乃爲立生祠。樹碑以紀遺愛。碑幾徧鄉井焉。除汀州路總管府推官。汀民強悍。易爲變。府君與上官議築城開濠以爲堡障。且請躬董其役。上官韙之。府君爲量功授期。使民爭趨。民不擾而事成。申屠公廟時爲閩部僉事。行郡至汀。稔知府君之賢。凡郡縣有赴愬者。悉下之府君。卽爲決治如律。無不憐乎人心者。已而不俟引年。遽上休致之請。朝廷以其廉退。陞翰林待制。階自將仕郎。九轉至朝散大夫。未幾卒於官。實至正辛卯冬十月二十三日也。享年五十有八。府君軀幹魁梧。方面美髯。見者聳然起敬。事親生能盡孝。旣死。其葬祭之凡悉依朱子家禮從事。居官尤盡心於獄事。夜參半。孤燈熒熒。猶繙閱成案不休。且曰。人命至重。吾可不盡心乎。江西鄉闈試多士。省府致書幣請持文衡。府君之所甄拔。皆通經藝者。爲人嚴而不苛。和而不流。稍暇集良朋。嘯傲林泉間。命壺觴以徑醉。其視生產作業之事。蔑如也。所著文辭。森嚴而演迤。有龍津、龍山、鄞川、環中、黃鶴磯、梅易齋、碧玉環、七藁。共若干卷。藏於家。娶樵溪危氏。諱淑馨。字蘭玉。宋禮部侍郎春山先生某之曾孫女。元江西儒學提舉徹之孫女也。贈建安郡君。通書記。作字有楷法。善治家事。不以煩府君。人謂婦道母儀。皆可無媿。先十年卒。男二人。燧。至正癸卯進士。從仕郎。大都路香河縣尹。燦。鄉貢進士。會閩中亂。起兵以助王師。死之。贈汀州路上杭縣主簿。孫男五人。燧之子伯挺。至正丙午進士。從仕郎。福州都轉運鹽使司知事。次仲堦。仲堦之子仲壙。仲堦府君之墓。在縣之元祐鄉黃孫里龍山之原。以至正壬辰四月某日葬。危夫人祔禮也。旣葬十餘年。燧自狀其行實。謁濂爲之銘。濂在弱齡。頗有事科目之學。輒聞閩中雷氏兄弟以易經相傳授。所爲

經之大義。流布四方。多取之。以爲法。蓋府君與仲弟杭皆第奉常。而聲譽熠然久矣。雖歆豔之。有志弗強。不及摳衣從府君遊。以折衷諸傳之是非。迄今四十春秋。顛毛種種。尙忍執筆以銘府君之墓乎。雖然。聲光之盛。僅著於當時。文辭之載。可勸於來裔。有如府君道德積於厥躬。政教被於民人。所至是愛。所去見思。揆之於前古。儒宗吏師。似無所讓。理宜大書深刻。表諸墓門。使爲士者知所勸。蒞官者知所法。不可以濂之蕪陋。而遂廢也。謹序而銘之曰。

閩有碩士雷作氏。自幼學易探聖髓。亦旣決科拾青紫。政行州邑。平如砥。鋤擊暴民。仁懦起。姦吏聞風潛若鬼。獄命至重心。靈爾一夫銜冤。賴有泚漢之循吏。當可擬。元龜護印。曳其尾。穹石序功。文煜煒。魂升魄降。吁死矣。四民會哭。動成市。遺文繽紛滿千紙。虹光夜發元筭裏。孫子繩繩襲休美。不信予言有如水。

故寧國路推官劉君墓誌銘

君諱畊。孫字存吾。姓劉氏。其先世居永新。至宋丞相楚國公沆始顯。楚公三世孫相始遷衡之茶陵。相生某。某生文祥。文祥生思允。思允生邵。邵生養正。與須溪劉辰翁友。日以詩道爲倡酬。養正生懋。承事郎。武岡路總管府經歷。君之父也。君家貧。日督耕。夜然松爲明。挾册呻吟。達曙。遂通五經。百家言。年三十。中天。歷庚午進士第。授承事郎。桂陽路臨武縣尹。臨武俗近蠻獠。豪民持縣短長者四十有五家。縣令長初至。輒以利啗之。指使如家奴。皆憚君。搖手相戒。不敢出。縣上。不產茶。而官征其利。始額不過錢二百五十緡。漸加至十倍。民不堪命。君上其事。罷之。鄰邑藍山羣獠。大肆攻掠。府遣使者諭降。獠迎使者馬首曰。儂苦

縣官虐。故爲亂。使得如劉。臨武者撫。儂儂卽安矣。調建德路總管府推官。丁母段夫人憂。再轉徽州。時經歷府君之官武岡。至衡而疾作。君棄官侍左右。未幾。府君卒。君載柩以歸。每遇風濤。怒張卽撫棺哀號。風輒息。距家五十里。曰雲陽山。河水秋涸。舟膠焉。君泣禱河神。夜水陰起五尺。柩至家。水涸如故。服除。改瑞州。騎驢赴官。人不識其爲君。高安縣小隸。徼民錢弗得。反誣民毆之。獄已具。君猝隸閭狀。隸吐實。君執法笞之。府判官雖欲宥隸。弗能奪也。民有獨居者。或偵其出。夜入其室。然燈照其物。悉取以去。縣當以劇盜法當斬。君原其情。杖遣之。憲府因知君。凡獄有疑者。移君讞之。臨江民陳松。使酒與東家奴鬪。陳歸中暈。夜卒。陳婦誣奴死其夫。君訊之。婦服其誣。新昌由丙妻與惡少年通。竊逃至番禺。生子矣。由往訴官取之。少年復相躡歸。將殺由。他男子與少年仇。嗾由曰。少年將殺汝。盍先圖諸。男子夜持刀。約由伺少年出手刺之。州若府俱以謀故論。君謂男子死固當。由妻與少年姦。番禺嘗有官書可驗。由殺有罪。惡得與男子同。由得免死。宜春李氏子。兄歿。寡嫂利其多貲。弗嫁。時往父家爲姦私。李慚。逆以歸。途中遇疾。寢劇。及抵家。李亟作食食之。已而卒。父揚言食中有毒。李素儒。以貨謝父。父指貨爲左驗。言於官。李竟誣伏。鞠連逮者。咸曰。吏持成案至。但逼書名爾。他弗能知也。復引嫂媵婢問故。其對如父言。君問食有餘否。婦人終不。善訐。對曰。食且半。妾與老嫗分食之。君抵几曰。脫使食有毒。嫗輩何以得不死。父知情得。遽投繯而絕。李罪遂釋。政成而歸。方思飲水著書以自樂。至正辛卯。斬黃妖寇陷武昌。君傾貲募義兵。築龍須壘。周圍可十里。民扶老幼來依者數萬人。寇來掠茶陵。君帥衆持戈矛助官軍逐之。復改宣州。階至儒林郎。時水滂。

爲災飢民訴者日以千計。君召豪右出粟而官與其直。選廉吏均賦之。且修城浚濠。令民之就役者聽活者數萬。乙未。廬州潰兵爲亂。夏六月。相率攻寧國縣。江東憲府治宣州。而寧國爲其屬邑。廉訪使十八沙知君賢。說以捍禦之策。太平郡丞禾攘引寇焚南陵。南陵民羅春擒之。十八沙以其國族。顧忌未決。君勸斬以徇。寇復據水陽者三日。水陽民張中帥勇敢士夜襲之。縛其兇渠十人來獻捷。下憲幕府議。幕府銜張不賄己。指張爲間諜。將曰戮之。君抗言曰。民執寇至。賞之猶恐不勸。況殺之乎。吾爲執法吏。不敢奉命。卒如君言。軍士利賞格。每縛平民衣以赭衣。詣轅門。君解縛縱之。亡慮千百。俄寇勢愈熾。君謂子頌曰。吾委質爲臣。誓與此城同死生。汝宜急去。以存宗祀。頌去未幾。浙省參知政事吉尼哥兒統兵來援。守兵久憊。恃援至。酣寢。夜四鼓。寇引衆緣堞而上。城陷焉。君猶勒兵巷戰。不勝。遂被害。時八月丙寅也。君弟燾。孫常寧州學正。湖南陷。常寧守臣棄城遁。燾孫攝州事。死之。子頌。江夏魯湖大使。與君起兵援茶陵。與寇大戰。亦死之。人以爲君家教所致云。君嘗四除推官。治獄無冤民。嘗自誦曰。刑爲天刑。法爲王法。死生輕重。當推以情。使其人故殺。吾不敢生之。爲枉於死者也。設其人過誤。吾不敢死之。爲枉於生者也。不然。則是執法者同殺之也。執法而枉殺人。尙何國法之掌乎。世稱爲名言。嗚呼。吾儒之效。不顯於世久矣。有若君者。事親則爲孝子。治獄則爲良吏。臨患難則爲忠臣。君子得其一。猶足以揚名天下。後世況君兼之者乎。君娶某氏。子二人。卽頌。頌也。壽六十。而葬某山之原。銘曰。

養之固。發之純。氣不響。名益振。千載下。徵斯文。

故承務郎道州路總管府推官李府君墓誌銘

東陽李思文。從州縣辟舉。試校官吏部。吏部移禁林儀曹。同命題試之。既中選。將歸蒞教事。謁濂成均。再拜而起。涕下如綆。靡良久。乃曰。先府君之歿。三十四年矣。憂患之相仍。金革之紛擾。餬口四方。曾無寧歲。今天地清寧。六合一家。幸重卜宅兆。改葬先府君於高原之上。而縣緯之碑。未有刻文。敢奉行狀以請。子知先人者。宜爲銘。濂諾之。久未及爲。思文復貽書見速。情辭懇款。讀之令人感動。王事有嚴。雞號卽乘馬出。逮還日。已若懸鼓矣。深慙有孤孝子之意。於是爇燈牖下。按狀而序之曰。府君諱裕。字公饒。姓李氏。其先自洛陽遷桐江。九世祖著。復自桐江遷婺之東陽。著之孫悅。字公瑜。當宋宣和庚子。方臘叛。其黨來寇縣。悅與兄匿灌莽中。兄爲盜所執。欲兵之。悅亟趨出。願以身代。昆弟爭相就死。寇義悅之爲。荷戈而去。及寇平。越帥劉忠顯公統軍至。欲悉誅從亂民。悅時與幕府議諫止之。活人數千。悅生皓。皓有六子。十三孫。皆悼尙詩書。而簪纓蟬聯從此始。其事詳載家乘。此不書。諸孫有諱大同者。從朱文公。呂成公遊。登嘉定癸未進士第。仕至寶謨閣直學士。通議大夫。工部尙書。君之高祖也。曾祖諱自立。淳祐辛丑進士。通直郎。通判慶元軍府事。祖諱儻。登仕郎。監寧國府城下酒麪務。父光遠。宋亡爲元。不屑仕。後以府君貴。贈承事郎。同知汴梁路許州事。妣某氏。贈宜人。府君幼失父母。鞠於嫂氏。事諸兄有若嚴君。既就外傳。卽知家學。相仍之盛。確然思以踵其後。發於聲詩。皆中繩尺。甫冠。聞許文懿公講道於八華山中。躡屐從之。推明濂洛關閩之學。久之。因喟然歎曰。學之所貴者。明體適用。苟不見諸用。猶玉卮而無當。未見其可也。乃徑

別親友杖策遊京師。撰至治聖德頌一篇。詣丞相府上之。丞相以聞。英宗召見玉德殿。令宿衛禁中。居無何。翰林羣公以府君才藻清麗。不當在持戟之列。遂奏爲國子生。會虞文靖公來爲祭酒。極器府君。每有撰述。輒瞑目倡言可書云云。府君執筆次第書云云。及文成。朗誦於公前。公遂指授以制作之故。所謂篇章字句四法。逐一續釋之。府君之學於是大進。薦紳之家。爭欲府君出其門下。天歷己巳。國子分監。扈從上京。歲適當賓。有旨命就試。府君領開平府薦送。至順庚午。擢進士上第。授承事郎。同知汴梁路陳州事。有朱衣象笏之賜。初。大河南決。州民扶挈施倪走旁郡。凍餒道路。悵悵無所歸。及河復故道。府君適至。與民約曰。爾亟返。安爾妻孥。治爾田廬。科繇之事。吾爲爾緩。諸民曰。衆未敢還者。正坐此耳。相率而歸。至數千人。蔡河亘城北。舊建橋以利涉者。河水暴悍。齧橋善圯。府君重作之。檄屬邑五長吏分程集事。不日而功成。倡優爲戲劇以射民利。晝夜聚觀。皆廢所執業。府君患之。捕寘於法。有挾權貴人勢欲脫去者。府君持之愈急。一城震悚。俗尙鬼。當歲時之隙。往往斬羊豕爲牲。使巫覡歌舞以樂鬼。比屋相倣。以爲不若是則厲氣將作。府君召閭師里胥。語以鬼神情狀。輿響數百言。遞相奔告。其俗遂變。市設醜僧。本以求民平黠者。反舞智病民。畏其近官。茹抑忍苦。莫敢走白者。府君撻發隱伏。捷諸市而易之。州有學久廢。弗治。府君往舍菜。已周視後先。皆傍穿上漏。不足以障雨風。慨然曰。此教基也。使其若是。可乎。卽命更朽腐爲堅良。治丹堊而飾之。復聘賢師儒。使坐堂上。申飭五倫之教。民大悅。部使者行郡。嘉之。舉府君可任臺察之職。章上不報。府君旣滿秩。遂謁選京師。已而其子彪死於家。府君傷之。鬱鬱成疾。在苒踰二年。竟卒於

旅邸時重紀至元戊寅正月癸丑也享年四十有五卒後一月。中書始改承務郎。道州路總管府推官。命雖下。不見拜矣。府君配蔣氏。將仕佐郎。典用監知事。吉相之女。封宜人。後一年卒。子男五人。長可道。以府君蔭任蘄州路黃梅縣稅務大使。次貫道。至正甲午進士。將仕郎。饒州路鄱陽縣丞。未上。辟詹事院掾史。後十九年卒。次卽彭。次順道。次思文。入國朝爲東陽縣儒學教諭。卽來請銘者。女二人。適趙古臣。盧璠。孫男七人。思志。思孝。思恭。思悌。思禮。思祖。思儉。府君旣沒。貫道不遠五千里。奉柩南還。家徒四壁。久不克襄。事後十年。爲至正丁亥十二月某甲子。始與蔣氏合葬西部鄉之錢塢。堪輿家曰不利。又二十年。乃改葬懷德鄉黃山之原。去尙書公墓二里而近。所謂重卜宅兆者。其時則吳元年丁未十一月之癸巳也。濂生也。後少府君十有六歲。初識府君於婺城之南。容儀秀潔。如玉樹臨風。傲然美丈夫也。及讀府君之詩曰。中行齋藁者。姿態閑婉。復類其爲人。心慕豔之。願締忘年之交。而九原不可作矣。幸獲與府君之子貫道遊。同試藝於鄉闈。貫道旣先登。濂竊以謂府君之家。科目相繼起。貫道是舉。足以慰府君於泉下。曾未幾何。而貫道亦死矣。嗚呼。三十餘年之間。而哭府君父子焉。予髮欲頽白。其尙可得邪。銘曰。

嗚呼府君。竟止於斯。楚楚其容儀。袞袞其修辭。其才又足以見諸設施。使魯無君子者。斯焉取斯。嗚呼府君。竟止於斯。雖五尺之童。慮有所知。期必躋於臚仕。亦不虞其若斯。豈天道之不齊。抑人事之有參差。自古以來。何莫不由於斯。嗚呼府君。其死孔悲。年不踰於五十。學僅克於一施。則夫突梯而滑稽。如脂而如韋。壽享於期頤。好爵之是糜者。彼何人斯。彼何人斯。

故泰和州學正劉府君墓誌銘

洪武四年春三月永豐儒臣劉于府君應詔來京。闕月丙子皇上御外朝召見。俾敷釋聖經賢傳。府君據其章旨而疏其會通。上爲首肯。再三翼日丁丑復召見。勅儀曹賜冠衣。又明日戊寅復召見。從容謂曰。爾能任州邑之職乎。府君俯伏。歷陳其情素。繼曰。臣生丁亂離。幸際真人啓運。獲見天日。豈不知效奔走以竭愚衷。第以犬馬之齒既衰。頰毛種種。自度不能有所爲矣。敢辭。上熟視之曰。爾誠老矣。宜賦詩以見志。府君揮毫立就。詩進。上大悅。命大官賜之酒。放之還山。五年春二月乙巳。遭疾。三月甲子。正衣冠而逝。春秋五十有五。歿後之三日丁卯。葬州東某里之巖坑。八年春二月。其子厚奉前監察御史丁節狀走南京。徵濂爲之銘。當府君之召見也。濂實侍上左右。親見召。被龍光。及退食青溪寓舍。府君又來謁。揚眉吐氣。論議頗英發。濂意其必享上壽以終。孰執別去。僅一年。遂作土中人矣。世事不可料。往往如此。可不悲夫。因不辭。序而銘之。府君諱于。字允恭。劉氏。其先漢長沙定王之後。定王生五子。其一封宜春侯。凡新淦清江之間有劉姓者。皆侯之子孫也。九世祖文。自新淦遷吉之永豐。曾祖洪。祖弼。父庭蘭。皆業儒。府君幼淵敏。矻矻嗜學。書室懸燈。屋壁盡黑。大父與客坐。命羣從子弟賦詩。府君應口成。今體四韻。語多驚人。客爲之動色。年稍長。以文謁虞文靖公集。公深器之。至正七年。用春秋取鄉試。第三名文解。會試南宮。不利。十年復薦於鄉。名在第二。北上。復不利。無幾微不足之色。獨謂親友曰。中原亂將作乎。風氣日漓。而人心不固。時鼓邪說以蠱其中。譬猶病者已在心腹間。吾得瞑目不見之。幸矣。未幾果然。時府君以下第恩例署

泰和州學正之官未久而羣盜蠱起。泰和當贛吉之衝。時元綱解紐。省憲之臣不相能。用兵爭疆。府君卒調解之。民陰受中。竟迎親以就祿養。泰和當贛吉之衝。時元綱解紐。省憲之臣不相能。用兵爭疆。府君卒調解之。民陰受其賜。秩滿還鄉。烽火猶未息。府君潛遁岩穴。幅巾杖屨。追逐雲月。未嘗以世故少嬰其念慮。熙和平沖。若將終身焉。國朝繼承大統。遣使者四出。徵辟賢能。府君至京師。以疾辭。越二年。游至。又固辭。會科目之行。歷考福建。廣東。二行省鄉試。得士爲多人。至今稱之。府君尙風義。立心忠信。伯兄蚤世。撫諸姪。如已出同年友。聶克敬。擢第而還。無以給道塗費。府君傾己橐濟之。士人劉季恭。值歲儉。困悴不能存。府君養之於家。與其同甘苦。他行事多類此云。娶王氏。吉水士族也。以婦道聞。子男子四。壽厚。鼎正。皆能繼其業。而厚尤善文辭。卽來速銘者。孫五善。嘉義。幹。啓。其所著詩文。凡若干卷。藏於家。濂官儀曹時。與會侍郎魯爲同僚。侍郎府君友也。備言府君嗜義如嗜利。知無不爲。或以非理相干。輒深閉固拒。弗之從。斷國忠宣公余闕。亦奇其爲人。嘗還自燕南。嘗作序贈之。公極慎許與。片言不以假人。則府君之爲人可知矣。使天錫以着年。日坐左右塾。陳說道德。令學者知所矜式。雖曰老而不仕。亦當有贊於邦治。奈何死之。奈何死之。不識司化權者果爲何如。可不悲夫。銘曰。

行潔而明。玉之輝只。文葩而則。錦爲姿只。鸚方摩雲。復退飛只。經畚之藝。日耘耔只。遠探聖髓。發樞機只。渾以及物。自邇推只。有聲四達。蔚爲人師只。烽火相連。望絕庭闈只。蹈彼虎口。終全親以歸只。名聞九天。錫以冠衣只。龍光炳朗。照耀里閭只。不有君子。將孰依只。一鑑之亡。中心悲只。太史勒銘。鑲在幽墟只。

故紹慶路儒學正柳府君墓誌銘

浦陽柳府君諱宙字致明。宋迪功郎嘉興府崇德縣主簿諱補之之曾孫。忠翊郎高郵軍高郵縣令元贈奉訓大夫淮安路泗州知州飛騎尉追封浦江縣男諱金之孫。翰林待制承務郎兼國史院編修官諱貫之子。府君爲兒時重遲不戲。潛心於問學。及壯益孳孳自治。端凝簡靜。若對嚴賓師。待制公宦遊中外者久。家政悉寄府君。能斬斬不紊。撫世酬物。卽始而慮終。壹歸於誠。內翰杜公本。修撰張公樞。極相推許。且謂其不豔榮利。有古逸民風。浙西部使者聞其賢。辟爲書吏。辭。繼以薦者。署紹慶路學正。亦辭。大布寬衣。徜徉烟霞泉石間。超然自得。武威余忠宣公闕來僉浙東憲府。行縣過其家。深加敬畏。退語人曰。待制公有子矣。元季兵亂。府君抱先世遺文。潛伏岩穴。餘悉不問。未幾家貲既於盜。府君絕無憂色。人慰之。輒曰。此亦命也。徒憂將何爲。壽七十一。以至正己亥十月甲子卒。十二月甲申葬。通化桐柏橋之東。配東陽潘氏。有賢行。子二。長桓。天次。穎。信之。永豐。財。贅居與賢女氏。後七年卒。次穆。循。循雅飭。能繼家學者。孫四。士唯。士忠。士恕。士魯。孫女二。適葛信。方文烜。曾孫男一本。濂也。不敏。受業待制公門。與府君交甚洽。而濂兄之孫女壘。又歸府君從子稷。今穆來徵銘。乃造銘曰。

鄭府君墓誌銘

鄭府君諱鑾。字景和。浦陽白麟溪人。其先自睦遷。曾祖政。祖德璋。父文轟。君家九世義居。羣從子姓中。而

君最良。婉婉怡怡。周旋上下。其和氣蓋可掬也。生平不以惡言加人。人有干之。示以一默。馭奴隸有恩。君亡已久。言之有賈涕者。享年二十有八。其配黃氏。諱淑。字延冲。君亡時年始三十。以節自守。潔白如冰雪。至六十一卒。子二源。濤。源字仲本。剛介有立。好施與。且通神仙家言。濤夭。孫一棣。善屬文。君卒於延祐七年十二月十五日。黃氏卒於至正十一年八月二十日。君先葬烏傷延壽山。堪輿氏咸曰不利。今以十四年十月二十六日遷於縣之靈泉鄉黃嘉山。黃氏附焉。予少與仲本爲金石交。遂以女珩歸其子。旣朋且有連。棣來徵予銘。義不得辭。銘曰。夫以義稱。婦以節聞。其何婉古之人。

薛府君墓誌銘

松陽薛益來浦陽江濱。以鄉貢進士朱公遷狀。謁志銘其先府君墓。會浙東亂。予隱去岩穴。不能成篇牘。後十年。予遊江表。益復來申前請。辭甚悽苦。予因爲之序曰。薛爲永嘉巨族。宋南渡後。有大儒生其間。學術論議。與閩潭抗衡。人以東甌學名之。松陽之薛。實與同宗。其諱堯章者。自永嘉來知處州。遂家松陽。松陽。處屬邑也。堯章之元孫某。軍節度。掌書記。南通春秋學。獨信遺經。而不惑於傳注。嘗著微意發端一篇。謂春秋正名之書。諸儒以一字爲褒貶者。皆非也。論者隨之。南之子沿江制置司幹辦公事。殊行。值宋改物。泫然有古今之感。賦詩見志。終身不仕。殊行生雅山。處士必慶。則府君之父也。初處士娶項氏。無子。繼娶劉氏。生府君。已而處士與劉氏相繼亡。項氏性格嚴。馭府君如束溼。髮雖頽白。不能免譴訶。他人無以

城府君惴惴懷畏不敢失尺寸。唯其所命輒將迎之。項氏酷嗜浮屠法。欲割家之半以事施與。府君欣然從之。不翅若自己發者。項氏不茹葷肉。凡獲甘實蔬材必畜之。謂妻子曰。爾等毋嘗之。吾將奉吾母也。或遇歲時。陳觴豆爲壽。帥子婦羅拜庭下。項氏因大感悟。喜見顏面。且曰。吾數之奇。不能爲薛氏生子。念歿後魂氣無所託。或爲餒鬼。每出涕不能禁。今汝夫婦善事我若此。卽死目亦瞑。及項氏卒。府君居喪盡禮。然素不惑佛氏之說。以項氏之志不忍違。竭力飯僧。人憐其孝而不議其非。府君幼喪父。及長始畢葬事。哀號扱踊如新喪時。常以不逮事爲恨。築菴廬塚側。遇諱日則衰絰往陳饋奠。飲泣而返。終其身不衰。府君治家有法。內外嚴肅。叱咤之聲不及奴隸。自念累葉以儒術振。不屑爲廢舉及刑名家學。以詩書訓子孫。親自程督。而不少懈。性簡澹。不妄與人交。人召之講樂則辭。遇賢士大夫共觴咏山水間。酣嬉淋漓。唯恐日之夕也。至正癸未。室災。府君無幾。微見於顏面。或來唁之。則曰。是有數焉。可無憾。所憾者。先人手澤自予而不存耳。已而作室如初。後二年乙酉五月四日卒。壽六十有三。又三年戊子十有二月二十三日。葬於北郭之原。處士墓左。府君諱溶。字平川。姓薛氏。晚自號曰桂軒。先配項氏。生二女。後配陳氏。生益。莊益通毛鄭詩。尤工古文辭焉。時稱名儒。卽來請銘者。二女歸項鏐。葉寧道。孫五圭。堅。增。塤。坤。女一尙幼。昔西河王延性至孝。其母卜氏以延非己出。遇之過嚴。延小心翼慎。卒能獲其驩心。當時史臣嘉延之行。列諸孝友傳中。今府君之事與延頗相類。州縣不以名通朝廷。使之得立傳如延。則序而銘之以詔後裔者。庸非君子之責乎。銘曰。

道貫三靈。功包萬象。孝之德兮。聖有明訓。天經地義。著民極兮。建善致順。以昭淳風。爲邦式兮。有碩者宗。奕葉能孝。行淵塞兮。府君紹之。畏於無形。益加飭兮。事涉至難。百爾順巽。莫之拂兮。易嚴爲愛。母子衍若。保終吉兮。天久乃定。其機自旋。非知力兮。北郭之原。太史列銘。勒堅石兮。粲粲將將。千載之下。如白日兮。

魏府君墓誌銘

惟魏氏遠有世序。相傳出鄭國文貞公徵。初居鉅鹿。宋靖康之亂。其諸孫某隨高宗南渡。來知袁州。遂家袁之萍鄉。歷若干傳。至諱某者。生南金。南壽。父子同試荆湖漕司。皆入高選。南壽遷鄂之蒲圻。遂爲蒲圻人。南壽生太學上舍天福。天福生府君諱雲瑞。字祥鄉。穎之善記問。從鄉先生盧應奎講說經旨。毫分縷析。弗之厭。會延祐科試法行。府君竭力從事。下筆袞袞數百言。盧君謂人曰。此魏家千里駒也。有司俾充貢鄉闈。咸期府君先登。俄疾大作。不果赴試。事既畢。厥疾乃瘳。府君拊髀曰。不仕無義。苟仕矣。舍科第而之他。非正也。今乃以病而阻。非命也邪。於是一切棄去。發爲歌詩以自娛。山巔水涯。竟日留連忘返。外舅宋氏當爲從叔嗣。或利其多貲。競諸官。宋貸金於府君。彌縫下上期。他日割產以償。及事成。所還不及十之五。府君笑曰。外舅之志遂矣。吾何所望哉。同里張甲命唐乙造券質田於府君。府君信之弗疑。三年不問其租入。甲忽令乙來贖。府君兄曰。券未經稅。竟奈何。乙曰。姑遲遲。往嗾甲訴縣。人勸府君稅券。曲之。府君曰。吾家昆弟斷不能作僞。寧失其田。無傷也。縣令中其計。以券爲私。使田歸甲。而不酬其直。甲不自安。願入所逋租。府君辭。府君有牛。繫於牧人舍。爲盜所竊。牧人蹤跡知其處。奔告府君曰。牛在矣。得十人與。

俱可奪而有也。府君曰：彼貧故爲盜，窮巷之犬，迫則噬人矣。不久必自覆，爾姑待之。豪右鄭仲瀉，挾官中氣勢，每魚肉民，民不敢誰何。聞誘府君族子爲券，欲侵其土疆。會省憲兩府交薦，府君典教郡庠，懼而不敢發。其壻郭昇之曰：吾何畏於彼哉！竟踵鄭之爲。府君詎郭自言，期以誠動之。郭見府君容貌魁梧，論議英發，心甚服之。已而請府君作大書，府君揮灑如飛。郭曰：先生奇士也，吾幾失之矣。請以田券還，而不願受直也。府君操心仁厚，而能鬱伏暴強，類如此。府君善學米南宮書，得之者不翅拱壁，尤喜著述。有筆記若干卷，藏於家。他如先世決科諸文，皆蠅頭細書，裝潢成帙，以示子孫。其儼儼之志，猶前日云。延祐己未十月十二日卒於齊安郡。上距所生至元戊寅十二月二十日，得年四十一。至治壬戌十月某日，權厝於某山祖塋之南。後五十年爲洪武辛亥某月某日，始克卜葬於黃蓋湖之原。禮也。府君娶宋氏，子男三人：長法孫，蚤卒；次己孫，今名勰，嘉議大夫，國子祭酒；次虎孫，亦蚤卒。孫男五人：子仁、子同、子栗、子樂、子仁、子同，皆蚤卒。孫女三人：王克用、熊彰、毛藝，才其壻也。曾孫男三人：思植、思茂、思誠。曾孫女一人，尙幼。濂也不敏，官翰林成均時，幸與觀爲僚友，觀乃以祠部主事張孟兼所爲狀來謁墓門之銘。濂聞府君言行多可書，要不止狀之所云而已。府君一日方出，見家人市物，競其價之低昂。府君叱曰：彼非嗜錙銖之利，肯樂於奔走耶！何屑與之較也。如其欲酬之，大司徒歐陽文公元名世鉅儒，而每稱府君爲賢，其往復尺牘，藏諸篋笥者，墨尚溼也。嗚呼！俗偷民僞久矣，有若府君之行之懿，其不爲善善扶世之一助矣乎。銘曰。

人僞方滋。動隨欲萌。錐刀之末。奮襁而爭。溫溫吉人。與物無營。事機之來。一接以誠。豚魚可孚。況乎冠纓。惓然心服。匪貌與形。慶流後嗣。學傳一經。施於有政。物無不平。黃蓋之原。峰迴川縈。以琢其珉。以掇其英。以昭其聲。以告諸冥。

鄒府君墓誌銘代黃侍講

無錫鄒君。以至順二年十一月二十六日卒。元統元年九月某日葬。後十有四年。爲至正七年。其子師尹。乃奉故禮部尙書宛平曹公所爲行狀來徵銘。謹序而銘之。銘曰。

鄒氏之先。世居晉陵。宋有忠公。以剛直稱。正色立朝。不震不懼。元符三疏。光於史牒。子孫蔓延。散處吳中。遷居錫山。家日以豐。君之曾祖。厥諱開善。祖諱成大。再世不顯。遇事有勇。及物以仁。入憚其嚴。而懷其恩。父諱仁聲。始列仕籍。將仕初階。不有食祿。懷其先業。益厚於貲。畜己裕人。遂大厥施。君諱德修。字曰君永。生而慧朗。長而凝靜。志學嚮方。器識愈宏。時無科目。不以文鳴。遺榮自適。優游卒歲。持身清約。不事侈麗。人有衣服。美錦織絳。君則弗御。終身布章。人有室廬。穹檐邃宇。君則弗居。取庇風雨。推其所有。惠於宗婦。由近而遠。恤其鄉鄰。爾弱我扶。爾匱我給。力苟可爲。靡有弗及。或觸機穿。深憫其窮。排難解紛。不自爲功。青青者篤。內虛外直。以名吾軒。用厲厥德。高蹈物表。若與世違。行孚於衆。譽望所歸。展也吉人。宜膺多祉。六十八齡。云胡不起。君配華氏。子男一人。是曰師尹。有學有文。其孫有七。二男五女。男侃與儼。克肖其父。女適顧璋暨錢允臣。餘皆幼艾。在室。銘曰。泰伯之鄉。崇德之里。爲君宅兆。其葬以禮。君所結交。時之豪雄。

知君最深。莫如曹公。謂君爲人卓越醇厚。其言有徵。可垂不朽。瞻彼佳城。松柏丸丸。有子承考。謁辭圖堅。願慙不敏。筮屬史氏。畀以刻文。昭示無止。

方府君墓誌銘

諸暨有義士曰方府君。字子兼。裔出元英處士千。千自新定隱鑑湖。其諸孫教。遂徙諸暨華山。至府君十三世。曾祖賀祖天。與父世卿。宋季遊太學。以文鳴。府君氣軒邁。讀書志欲篤行。不屑泥章句。見裂載籍以綴文題者。唾去。與兄鐵甚相友。人或鼓簧言滅之久。不能無動。府君悟曰。兄弟天屬也。我何敢爾。我何敢爾。卽造兄前。且拜且泣。金棺悉聽其所爲。弗問。簞食豆羹。非對案弗御。閒以論辯貽兄怒。輒屏氣長跽。伺怒霽方起。歲大祲。人盜無斗儲。大厲又頻行。咸自度必死。競操挺起爲盜。府君憂見顏面。盡斥故藏。易粟東陽郡。椎牛醞酒。享壯者。使巡耄弱之廬。口賦以食。病者親注善藥。環數十里。無譁賊。捕掾恆倚爲聲援。府君營腴田十二頃。貯其歲入爲義莊。凡宗屬孤悖貧窶者。月有給。嫁昏有助。死喪有棺槨。及瘞蕪之阡。復設義塾一區。中祀先聖先師。旁挾六齋。後敞正義堂。招講師以六藝摩切諸生。義聞烜赫。士有不遠千里至者。業成多至大官。侍御史馮翼。欲上其事。府君謝曰。此無甚高事。假是以徼寵名。非人行也。府君祭先甚謹。牲牢必潔。頌帥家人。鴈鷺行進。就位立。不失尺寸。升筵奠醴齊。執事者薦籩豆脯醢。興俯拜跪。穆然無聲。治家內外。斬斬與人交。不設城府。客至執觴。興曰。請以是爲君壽。連日夜不厭。客辭去。亦不復強也。天歷戊辰三月丙寅。以疾終。得壽若干。娶富春張氏。子四。澤。哭府君過哀。疽發卒。汝。饒州路樂平州。

儒學教授。澗、澗、有德有文者也。孫四、樓、樞、拭、曾孫二、焯、焯。其年夏四月庚申葬。府君白門里鳳凰山下。執紼者數千人。皆出涕。宗族耆長及五尺之童。至今言及府君。輒呱呱泣。天台項爛先生狀府君之行甚備。泗持來謁予銘。范希文有意賑族貧不逮者二十年。及爲西帥。登政府。始有祿賜之入。而終其志。府君以布衣行之。且建學焉。豈非所謂豪特士哉。庶幾可不朽者。銘曰。

士之有施。欲奮而飛。卒韜其英。養之冲冲。振之隆隆。唯積乃成。有廩之充。有學之豐。益昭厥聲。我卹我宗。寧置我躬。澤及孤惇。皁比儼如。衿佩鏘如。左尺右繩。百鳥紛紜。西東成羣。孤鳳之鳴。儻爵析圭。族有濟羸。亦聞之腥。矧克教之。以樹其彝。以膺其誠。不震其淪。誰廓其潛。後嗣曷程。白門之陽。有崔者岡。尙勒斯銘。

浦江戴府君墓誌銘

濂弱齡時。師事淵穎先生吳公於浦陽江上。先生素有林泉之恩。以五洩七十二峰之勝。特往遊焉。時某實侍杖屨之側。未至五洩三十里。日將暮。乃抵戴府君之居宿焉。府君大布冠衣。風神峻潔。超然有前代遺風。設筵以饗先生。直至夜分。四座皆摧竭不能支。府君危坐。肩背竦直。曾無動搖意。濂竊異之。因質於先生。先生曰。府君之行。可稱譽者甚衆。姑與爾一二言之。當德祐丙子之變。惡少年相挺而起。執白梃暮夜擊傷民。咸不能自保。府君用計安之。卒能養厥父母。無他虞。府君往遊浙水西。或妄言府君道卒。母夫人朱氏哭之喪明。府君還。念母不置。夜露禱於天。摘木葉曰冬青者。浸水舐之。期年目復明。人以爲孝感所致。朱氏旣歿。其繼母傅氏生子惠。方秉家政。府君漫若不及知。凡貨產一聽惠所取。弗與之較。惠與鄉

并不相能。人欲求隙加害。府君資其遠仕。闔嶠避之。貧民有貨錢不能償者。府君出質劑悉焚去。媼族之無以自存者。生使其能養。歿使其自藏。汲汲如不足。從祖母盛氏。張氏。各生子而寡居。府君養事之盡禮。以全其節。其子先長。悉稽前人土田均予之。此事尤卓異於人者。濂聞已竊謹識之。後三年。應書鄉闈。識府君之子性中。遂與性中定交。又十年。性中之子灑。從濂學經於郡庠。灑一一叩之。其事皆如先生言。則府君歿已久矣。今年春。濂有千里之役。性中要濂於道。且泣且言曰。知先人之詳者。莫過於吾子。吾子倘不銘之。孰宜銘之。濂不敢辭。府君姓戴氏。諱程。字君玉。世爲婺之浦江人。曾祖某。祖某。父子道。府君享年八十有四。咸淳丁卯某月日生。至正庚寅某月日卒。以某月日葬於上戴宅之原。先配許氏。生長明。再配薛氏。無嗣。三配李氏。生從善。思誠。性中。用和。孫男灑。某某。嗚呼。若府君者。可謂一鄉之善士哉。爲之銘曰。其生也全。其歿也安。君子知其然而不知其所以然。請視斯阡。

戴府君墓誌銘

府君諱胃。字養和。戴氏。台之黃巖人。其先在宋季。以詩書家著稱。嘗有顯者。自府君曾祖敬老。祖天鑑。父開孫。皆不仕。府君生十年。父稱古賢子。事爲訓。府君指問其父曰。此何如人耶。父以賢者應之。府君曰。某以爲神人耳。固亦人耶。其父異其有志。旣長。闔毅通達。學周易。尤精推驗測究之法。他若醫藥。兵刑。律歷。皆習知之。壯歲嘗自奇其才。走燕京。謁元左丞相木兒。一見語相投。留教其子。府君時時以計于之。左丞相稱善。號之曰鵬飛先生。言其才當遠致。故云。將薦於府君。私歎曰。吾以數推之。中原有事矣。遂以母

老辭歸。益攻其舊學。曰。吾非不欲聞達。吾才非不如人。然而不得者。有命也。已而亂果起。坦然不憂。若素知之者。年七十有三。將卒。速諸子具酒爲樂。引杯劇飲。焚其所爲文。謂家人言。死乃常事。何以憂爲。凝坐而逝。至正二十三年十一月二十七日也。嗚呼。可謂達生者矣。府君娶李氏。宋將仕郎應發之孫女。子男二。建心。建則。建心爲某官女。一適某孫男。宜誥。宜民。葬在卒之明年二月二十六日。墓在靈山鄉。覓與大嶺之東。銘曰。

孰揭其衷。俾周以通。孰闕其逢。俾窶且窮。始若有爲。而竟靡庸。維其靡庸。乃潔其躬。乃洞其終。惟後嗣之隆。

故田府君墓誌銘

同郡田府君卒。墓上縣綽之碑。未有勒文。其子洞。命濂學子劉剛集諸行成書來請銘。按書所載。府君諱貞。字子貞。田氏。田初李姓。家杭之新城。方臘陷杭。有李基者。避地婺永康田迪功家。迪功無子。唯一女。遂留基爲贅壻。基生子遂後田氏。基字伯開。府君五世祖也。伯開生某。某生某。某生存理。存理生瑞。以富甲羣族。府君實爲冢子。力佐家政。應公府科繇。櫛風沐雨。皆不憚。父既歿。爲諸弟授室。苟可以致力者。孳孳弗倦。及諸弟求離居。府君務盈其欲。一髮無係吝。人稱其賢。府君辭曰。兄弟同氣者也。豈可誠食貨以傷其心。此分當然爾。至正丁酉。寇起縉雲。鄉民奔竄巖穴。且饑饉。頻仍。道殣相望。府君出粟。資中賑之。皆羅拜於庭。曰。我等姓氏已在鬼籍。非公誰復生我。儻有所役。雖使蹈水火。無恨。府君遂結義旅。使捍敵閭。

井處州守臣石抹將軍及浙東廉訪使者皆材府君命攝巡徼之職。辭歲戊戌。天兵下浙東諸郡而七閩地未入版圖。福建省臣間道遣使持空名勅書授府君武義尹。欲鈎致之。府君知天命有歸。遂縛使者焚告身絕之。府君性剛介。聞義勇爲。所內交皆端人。凡儉卑婢媿輩。咸唾去不顧。建義塾一所。聘文行儒爲師。集鄉子弟教之。尤篤於訓子。晝夜淬厲。必欲其亢宗。然見疾病癢痾者。心惻然憐之。手注善藥使服。雖其請再三。弗之厭。晚年襟度益夷沖。家事屬之諸子。日盤桓佳山水間。翛然不爲塵土所染。行年六十又六。令終於家。實洪武壬子正月二十六日也。明年癸丑十一月某日。葬縣之長安鄉金山之原。府君配室徐氏。以貞淑聞。先七年卒。子男子六。旭、洞、溟、溟、免、廣。溟、天、洞通經而能文。嘗貢於鄉。取第十名文解。已而銓曹授河南都衛斷事官。遷湖州府通判。焯有聲。孫男三。寅賓、寅恭、道同。女四。吾婺爲文獻之邦。風聲氣習。莫非禮義之所涵濡。以故人多士君子之操。有若府君。制行嚴謹。惠利及於一鄉。且明炳幾先。灼知天命所凝而不惑。非有超然卓絕之識。不能致也。嗚呼賢哉。銘曰。

惟金華文獻邦。教斯漸。德惟良。猗君子。制行方。恤同氣。有如傷。出餘粟。起羸疴。結砦柵。禦寇攘。遏狂瀾。作大防。察天命。知靡常。縛閒使。絕外望。歸有道。誓爲氓。叶著先識。播清芳。滋遺後。以文昂。佐方州。仕凌昌。金山原。松檜蒼。紀茂行。薦石章。

戴仲積墓誌銘

余之同門友戴叔能。有兄曰仲積君者。戴氏之良也。戴爲其鄉望族。子孫盛行。君分卑年少。一旦學識出

諸父右。而能敬讓自持。不矜不揚。商事權理。一族爲之聳聽。其待鄉黨。接賓客。不翕翕以附。亦不鄙畜以自足。每有過從。輒封肴醢酒樂之。雖庖傳屢空。弗顧也。然氣高性褊。不肯脂韋屈下人。彼或有挾以陵之。則必剖條辨要。求直於有司。人皆始而忌。終而敬。且慕。不復吐一辭以犯。母夫人病。久不瘳。醫之知名者。君悉迎致。其藥餌之品。多附子靈砂之屬。錢動數萬計。君營治勲悴。而病益以增。後遇烏傷朱君彥修。始知其藥之非。方圖改法。而母病不可爲。君痛迫於心。旦暮號泣。幾不能終喪。既而曰。吾母不可復作。而他人之有親也。醫復持是殺之。其禍不亦慘乎。乃悉取素難靈樞甲乙太素等書讀之。復奉幣彥修。以質其疑問。盡得金名醫劉完素張從政李果三家之說。不數年來。隱名動吳越間。有不遠數百里來迎者。君以脉證形色。定人死生。治不治。輒先喻日期。後僂指徵之。百不失一二。至是益知母死之非命。寤寐修省。怨悔內積。查雖強顏與諸公接。夜則咨嗟涕洟。衾枕爲之盡濡。如是者十有餘年。遂至陰消陽勝。而痿痺之證作矣。僅一載竟卒。君自幼知讀書。喜作唐古體詩。工晉楷法。至於陰陽家卜宅相墓之術。亦往往精到。然最善於醫。故用是以名。君諱士世。其字仲積。婺浦江人。生於大德丁未八月十九日。卒於至正己丑十一月十三日。得年四十有三。其配曰劉。越諸暨人。君在不虧婦德。君歿。晦子女有母道。後君十七年。年五十六而終。劉將屬纊時。命其子思恭等曰。汝父骨已朽。我卽死。汝必穿父穴以合窆。然冢上之石不立。是汝掩父之德。而并忽忘於我也。金華宋太史。汝仲父所與遊而有文者也。汝往求爲銘。則汝父與我皆可不朽矣。於是思恭哭拜於門。授君行狀。及劉之言告。以請。余與君之季叔能交最久。故君之平生。皆知之。

甚習今思恭又能念父而致其母氏之言如此敢不諾而銘諸君曾祖諱錫祖諱濤父諱暄子男二人長即恩恭次思溫皆業醫成先志也女一人嫁諸暨倪道曾孫男二人曰宗儒曰宗儼墓在家北二里許全本之原其葬之時則明年庚寅十二月丙午云銘曰其行也孝其志也仁若可有施而不一伸維其靡贏以尙其嗣人

張府君墓誌銘

無錫有卓偉倜儻之士曰張君飛卿身長七尺面如頰玉盤雙瞳炯炯照人鬚鬣奮張見者爲之改容然氣岸孤鶩不同一世側媚士雖當時貴人言不循理必面折不少貨或譏君疾惡太甚君曰天生我口所以出言也當言而反訥惡用口爲元之季世僞吳張士誠據姑蘇而無錫相繼陷髡黥盜販之徒首纏絳帕手執戈矛巡門嘯呼民情洶洶恐且暮有屠戮之慘君曰避寇路絕奈何捉筆大書邵堯夫聽天吟於屏曰上天生我上天死我一聽於天有何不可鄰曲來問計者君不答指以示之君子以爲知命吳元年丁未大兵平定姑蘇太傅徐魏公縛士誠送京師遣豫章侯胡公帥師圍無錫吳將莫天祐時號老虎猶欲聚土孽固守太傅再命使者諭降天祐俱殺之太傅怒傳令胡公曰卽不下可屠其城君知事急率二三父老往見天祐揚言曰吾民不見天日十二年張氏已就縛縱負固自守將誰爲況未必能守耶天兵如雷如霆膺之者無不齏粉一城生聚死生定在今夕願熟慮之天祐沉思良久擲帽於地曰誠如君言君乃絕南城而下走謁胡公胡公問所以來之故君進曰無錫亦良民安敢自外聲教不幸居割據之中

咫尺雖近。奚翅千里之遠。耳目塗塞。若罔聞知。明公奉揚天威。頓兵城下。勢若泰山壓卵。孰敢不懼。今不避萬死。特爲生民請命。惟明公加察焉。胡公觀君氣貌非常。言辭復慷慨。喜曰。君誠福人哉。城不受兵。宜也。遂命君還。君叩城門呼曰。亟開。吾事濟矣。闕吏啓關而入。天祐出降。所活數十萬人。胡公去。民爭聯帛爲帳。賦詩詞餞之。君皆爲作行草書。鳳舞鸞翔。人以爲不可及。初。君贅女氏沈福家。沈賢而無子。君養其夫婦終身。而尤篤孝二親。敦愛昆弟。田宅悉讓與之。弗問。君有志事功。當路忌其峭直。不敢薦。其大父居仁。尤負氣不羈。元至元中。江南皆附。有官福王府者。以賈降授官。出入驕從甚都。會夜歸。居仁適前行。隸卒屢呵止之。居仁張目叱曰。斫頭賊。斫頭賊。旣賈爾主矣。尙敢爾耶。反足蹴碎紗燈籠。官恚甚。執送縣令。欲斃於獄。縣令命吐辭款。驚曰。此奇男子也。釋之。父顯。有先人風。隱居教授。非類不敢近。或者謂君之抱負。濡染家庭爲多。君嗜學不倦。酷愛孟軻氏養氣之說。反覆爲諸子誦之。援毫爲聲詩。須臾成章。皆有可觀。而未嘗存藁。生二子。長籌。溫潤如玉。博學工古文。至正末。連中鄉貢進士舉。入於國朝。用薦者應奉翰林文字。累官禮部尙書。次所安。女一。歸馮輔。孫二。訥與訖也。君諱翼。飛卿。其字。卒於洪武二年四月二十七日。壽六十九。以某月日葬。惠山西南張山之原。嗚呼。傳有之。活千人者。其後必封。君以剛明正直之才。雖不爲時用。片言之間。活數十萬生靈之命。陰功在人者。甚夥。宜其嗣人位司喉舌。而秩聯六卿也。天之施報。豈惟是哉。地封所及。澤溼九泉。不至於公侯。吾未見其止也。銘曰。

君子之學。養氣爲先。氣之浩然。其直如弦。有若張君。剛烈之姿。嫉惡如仇。白眼望之。曷以致斯。訓自祖父。

彼賣降者。叱之如鼠。干戈續紛。孰不褫魂。死生聽之。謂有命存。十萬雄師。自天而墮。泰山壓卵。城無不破。何哉。老鷲猶欲跳踉。大言誓之。俾出就降。乃絕南城。乃謁轅門。爲民請命。如救溺焚。片言之間。竭盡始終。漫漫殺氣。變爲春融。昔焉嗷嗷。懼爲白骨。今也嘻嘻。冠衣有秩。活我者誰。咸言君功。告厥子孫。以傳無窮。天道可徵。君有賢嗣。朱衣金魚。出入禁御。惠山之陽。張山之原。有蔚者阡。英風肅然。

故王府君墓誌銘

余來讀書浦陽江上。凡遇醇厚之善士。必禮貌之。又稍與之遊。縣之深溪有王府君。系出義烏鳳林。先世嘗有顯者。府君雖肥遯不仕。其爲人也。好善。鄉人服之。至不忍欺。歲儉出粟貸人。不求其息。或屢不能償。又復稱貸。府君亦從之。人笑其迂。府君曰。吾誠迂。彼豈有餘力而不我歸哉。人有嚮產者。必增其直。以足其意。鑿石鍊灰。以腴稼者。旣卽府君山。復飲食之。而始收其利。甞人無田。藝富民之田。而中分其粟。乏力者。粟輒不登。在他人必易藝者。府君卒不變。人笑其愚。府君曰。我誠愚。教吾子孫爲寬仁之人耳。里有池塘。延袤可二十晦。其二婚家力爭之。數訟於有司。不決。府君慨然曰。所貴爲士者。能爲閭井解紛耳。況與之有連乎。乃取內子金條脫質錢若干緡。刺羊豕以合之。酒半酣。捧錢而跪進之。各驩然而忘其訟。向之笑者。至是咸服。府君爲有德君子。愧曰。吾儕小人。焚芻爾。營營爾。安足以窺其中哉。予嘗與府君合飲。香嚴佛祠。旣稔聞其善行。數審視之。其衣冠不詭於人。其發言和而有則。其飲酒至百觴不亂。且執予手曰。子文辭誠美矣。惜不識酒中之趣耳。予爲之驚喜。嗚呼。此其所謂醇厚之善士者。非邪。府君晚年以家

事屬諸子。幅巾杖屨。遨遊大山長谷間。秋髮繽紛。脩然如物外人。年七十三。忽嬰微疾。呼家人謂曰。吾將逝矣。爾等當法我儉勤。更效同里鄭氏九葉聚居。吾瞑目泉下矣。言畢。形神乃離。實元至正辛巳八月十五日也。壬午十二月二十四日。葬於大樣山之原。距家西三里而近。府君諱澄。字德輝。其姓王氏。曾祖某。祖某。父某。母某氏。娶鄭周二氏。子三人。子覺。子麟。子偉。皆周出也。子麟出爲仲父。汝後孫八人。應念。憲。舉。勲。慶。念。恩。女三人。義門鄭渙。同里周資。張侃。其婿也。曾孫二十人。澤。涇。浙。江。溫。淇。潛。瀏。溶。瀾。潛。淪。溥。瀟。洗。滄。涯。泓。濠。涓。女五人。未行。嗚呼。太樸之散久矣。嗜利之徒。惟思肥己而瘠人。恨不搯其亢而監其腦。尙有如府君者乎。勒石墓門。用以爲勸也。銘曰。

行修於身。惠洽於人。名行乎薦紳。天之報施。裕其後昆。合筵而食。以孝義聞。斯何愧於樊張之倫。凡樂善者。視茲刻文。

宋學士全集卷之二十二

墓誌銘

故江南等處行中書省左司郎中贈奉直大夫浙東等處行中書省左右司郎中飛騎尉追封當塗縣子王公墓誌銘

洪武戊申春正月。皇帝正位宸極。布告中外。念及奮勳。例頒恤典。於是故江南等處行中書省左司郎中王公之歿。已七年矣。初。公之既歿。上詔有司議。贈公奉直大夫。浙東等處行中書省左右司郎中。飛騎尉。追封當塗縣男。且俾與享樂籠山功臣廟中。上猶未慊其情。至是復仍其舊縣。進爵爲子。以寵之。公之子文。感皇靈之游被也。虔奉命書副墨。焚告於墓下。明年己酉冬十一月。持翰林待制王君禕所具事行。求濂爲銘。以修上之贈。濂辱與公游。不敢讓之。遂按狀而序列之。公諱愷。字用和。姓王氏。太平當塗人。幼有大志。沈酣六經。諸史。聞必欲見之於用。起應府公之辟。爲府史。疏讞獄訟。人服其平。歲乙未。上取江南兵臨當塗。卽召公至幕府。上方爲元帥。命爲掾。以參決戎事。丙申春。從王師下建業。又下京口。京口民新附。机阻不安。公慰撫之。始定。上爲中書平章政事。建江南行中書省於建業。陞公左右司都事。公遇事善於彌綸。日以薦賢爲先。元戎宿將。咸器倚之。唯公言是信。戊戌秋。猫獠兵數萬自杭來降。待命嚴陵境上。上遣公馳入其軍。喻以禍福。偕其渠帥來朝。是年冬。上將征浙東。時婺之蘭溪已下。僉樞密院事胡公大海

戍之上命公與胡公定議取婺。親帥師圍其城。守將出降。公審察民情而奠綏之。歷言上前。無有不聽者。己亥春。王師攻越。久不下。夏六月。師還。上留胡公鎮婺。而民賦軍器之務。咸以屬公。冬。王師克三衢。擢公左司郎中。總制衢州軍民事。公增城浚濠。置游擊軍。募保甲翼餘丁及舊民兵。得六百人。以益戍守。兵食不足。則斥並城廢田五萬七千畝。使之耕以自給。民有田。力弗能藝者。聽軍士貸耕。而爲輸糧縣官。籍江山常山龍游西安四縣丁壯。凡六丁之中。簡一以爲丁。置甲首部長統之。丁壯八萬有奇。得兵一萬一千八百。無事則爲農。脫有警。則兵者出攻戰。而五丁者資其食。開平忠武王屯兵金華。其部將或來侵民。公偵知之。械而撻諸市。王使人讓公。公對曰。民者國之本。將軍天子股肱。肯令傷其本乎。撻一部將而萬民安。計將軍所樂聞也。王嘆美之。開化馬宜差挾舊邑印章。誘編氓爲變。江山楊明。特砦柵之險。叛服靡常。公皆定計擒之。梟首以徇衆。部內帖帖無譁。民飢疫相仍。死者枕籍道路。公出倉粟。使作糜哺餓夫。修惠濟局。居藥以注病者。所活不可勝數。學校廢於兵。公爲浚泮池。築杏壇。建極高明亭。設博士弟子員。孔子家廟之在衢者。公亦爲新之。退食之暇。輒集薦紳之徒。摩切道藝。人士翕然悅服。諸暨戍將謝再興。與部帥王甲有違言。幾致亂。上令公調解之。公善於說辭。二人之驩如初。邊鄙以寧。同僉樞密院事。李公文忠以國之懿親。握重兵鎮嚴陵。上命公往來佐其軍。庚子夏六月。僞漢寇龍江。上召嚴陵帥葛俊。擣廣信。以牽其師。道過衢。公謂俊曰。廣信僞漢門戶。彼旣傾國入寇。寧不以重兵爲守。非大將統全軍以往。不可。若出偏師撓之。未見其利。設有挫衄。吾衢先釋騷矣。乃止。俊而請胡公行。胡公至而廣信潰。一如公言。辛丑。

夏拜胡公江南行中書省參知政事。分省於婺。以控制東浙。公仍以左司郎中分治省事。金華、婺劇邑。役民無藝。公令民自實田。請都以糧多者爲正里長。寡者爲副。正則以一家或二家充。副則合三四至七八而止。通驗其糧而均賦之。有一斗者役一日。賤與貴皆無苟免者。金華周泰、義烏柳昌。恃使以蠹民。公逮至於獄。皆痛懲之。自是畏避不敢吐氣。猾胥潘立道。操金華一邑田賦之柄。飛寄詭遁。並緣爲奸利。公廉其罪狀以聞。寘於法。胡公日治軍旅。以略曠縣。禦諸暨爲己任。分省之政。皆公統之。公挈綱布紀。風采凜然。僞吳將呂珍侵諸暨。欲堰水以灌我城。胡公奪其堰。反決水灌珍。珍勢蹙。乃馬上折矢與胡公誓。請各解兵。公聞之。移書謂胡公曰。彼狡謀爾。慎毋信。今珍在重圍。是天授首之日也。胡公不忍食言。竟從之。珍畏敗盟而去。先是。貓獠軍來降。胡公分其衆萬餘戍婺。其帥劉震等相撻爲亂。胡公被害。公亦及於難。當難作時。貓帥多公恩。欲擁之而西。公正色叱曰。吾天子大吏。設不幸。義當死。寧能從賊反耶。賊初縮首不敢犯。拘繫一日。而罵賊聲愈厲。命左右取酒引滿。竟日達夜。旁若無人。賊知不可屈。遂刃之。壬寅春二月七日也。享年四十有六。上駐蹕江西。聞公之死。爲之嗟悼良久。親爲文祭之。及返柩金陵。上復率羣臣往城南祭奠。乃以其年四月十一日葬江寧縣鳳臺西鄉聚寶山之原。公狀貌龐偉。氣局堅凝。善謀而能斷。嘗以事入諫。上弗聽。公卻立戶外。旣暮猶不去。上出。怪問其故。公從容諫如初。上慨然從之。公於吏事尤長。據律按比。而飾之以儒術。案牘經其裁削。辭簡而意周。喜爲詩歌。與賓朋談笑樽俎間。更唱迭和。情意豁如也。故於其歿也。人莫不傷之。公父諱榮。母孫氏。配張氏。子男子三人。長卽文。有學行。今爲侍儀使。階

承直郎。次行。賊害公之際。行方侍側。或勸其去。行曰。棄親而求生。吾不爲也。卒隨公以卒。次升童孫女一人。濂爲左史時。侍上左右。嘗與濂論佐運之臣。以字稱。公曰。王用和。經濟之材也。吾將大任之。惜乎早歿於難。則上所以簡注公者爲何如。使公之存至於今。必躋政府。歷憲臺。澤及於民者將益廣。不特前所書而已。人之患也。有才而無其時。今公雖有其時。未能大顯。而命止於斯。不亦悲夫。雖然。公之贊治外垣。爲賢賓佐。及臨患難。冒賊而死。爲忠臣。天恩所加。便蕃優渥。名亦足以不朽矣。在公可無憾。銘曰。

真人之興。肇自濠梁。白旄黃鉞。指麾四方。桓桓豪英。雲合響應。維時王公。杖策出迎。龍旗所屆。靡役弗前。借箸以謀。燭於幾先。莫搖嚮風。帥徒內附。公往撫之。謂公來暮。浙河之東。婺爲名邦。六師一臨。完城以降。奏凱而旋。留將戍守。公持文墨。參其臧否。姑蔑遺墟。旣入版圖。兵民二柄。孰幹其樞。帝詢在廷。非公曷可。公拜稽首。卽日上道。城增而高。復浚其濠。游擊置戍。金柝夜驚。孰爲頑民。嘯呼搆亂。誘而縶之。邊烽晏晏。出粟哺荒。注藥起疴。民豫且康。弗教則狂。乃新泮宮。乃置博士。乃設俎豆。乃經乃史。金華建藩。控於海東。還公來治。若疢在躬。科繇匪度。均之平之。閭右奪政。辟之刑之。民樂其生。親若父兄。敵畏其威。望如長城。豈期妖豎。相挺爲變。大罽不屈。遂罹於難。人孰無死。公死則忠。正氣不沒。凌厲秋虹。皇情盡傷。親御翰墨。摘文祭之。龍光赫絕。受才孔多。竟不盡施。清風宰木。凄其餘悲。不朽維文。大書深刻。後百千齡。過者必式。

故贈將仕佐郎禮部員外郎瞿府君墓誌銘

濂侍講禁林時。蘇之良士瞿公莊來爲典簿。其爲人也。文學蔚茂。而勵行堅凝。濂甚敬畏之。凡應制諸作。

多出其手。率皆稱旨。自是與之締交。不翅伯仲然。間以先府君墓銘爲屬。濂以索文者接踵於門。雖諾之而未暇爲。今蒙恩致政家居。又復移文以申前請。乃序其事而繫之以銘。序曰。府君諱嗣興。字華卿。姓瞿氏。其先居河南。後徙通州之海門。宋末有諱某者。避兵南來。至姑蘇之常熟家焉。生二子。曰青。曰筵。俱有才力。能伏其鄉人。元兵取江南。有劉將軍者。徇地至姑熟。青與達帥里中強壯拜馬前迎之。有獾犬突出軍中。乘隙。持弓不敢發。青直前一箭射殺之。衆譴曰。壯士壯士。可官也。青曰。吾不如吾弟達。將軍遂出旗號。俾達招諭未降者。承制授達爲百夫長。及宋亡。遷蘇州巡鹽大使。兼管內六縣捕盜。轉憐口提領。娶某氏。府君其子也。府君少時。家有祿食。日從其徒射獵。飲酒爲樂。不喜學書。然天資仁善和順。未嘗有過。年十七。怯憐口以例革。不置官提領。君家食甚貧。府君卽折弓矢。脫略紈綺。故態躬力穡事。以養二親。承候顏色。唯恐弗至。母嘗病疽。時天熱。疽潰臭不可聞。人皆掩鼻趨過。府君跪床下。執蒲葵扇。驅蚊蚋。以手摩穢剔汗。扶其起臥。不解帶者三旬。至愈乃止。母又嘗患積氣。危甚。醫弗能攻。或告以股肉可療。其法實刀孟上。而禱於神。俟刀躍乃可割。府君如其言。自旦至晡。頓顙於地。顙破血流被面。刀弗動。府君泣曰。天忍不憫我耶。我縱以身易母。猶甘之。肉何暇惜乎。知刀終不可動。起引之。割肉。置孟中。裂帛漬血。裹創。戒左右勿洩。羹之。謬稱他肉以進。母不食已五日。見羹喜。爲之握筯。食一杯。幾盡。食已而瘳。母後感疾。思啖菱時。菱未葉。逼市之不得。解衣入菱澤中。哀號索之。竟日。手足皆腫。俄得菱實三。馳歸遺母。母疾如失。旣而貧愈甚。或隔日一炊。府君曰。事急矣。儻守之而不變。如父母何。攜家入蘇城。謁多錢翁。有所稱貸。多錢

翁察府君誠信可仗。出資財俾府君買遷。而分其息十之二。府君由是稍裕。凡父母所欲。無不致也。府君不妄取而好施。嘗朝出道。獲人所遺囊。有楮幣若干錠。視其名。則市中小夫。府君坐不貼席。走其家還之。有墜田宅券書及他貴物於路者。府君覽之曰。券書失。啓爭端。蹤跡其人。呼與之。其人權貴家奴。失主券。畏罪欲求死。叩頭謝曰。活我者公也。氈工王氏。大雪凍餓。不能起。竈突無煙。府君憐之。天未明。攜錢二十緡。潛投窗隙而去。數歲出糶。有糶人來糶。衣不掩脛。府君受其錢五千。陽忘曰。汝糶十千邪。倍與其粟。糶蔬者過門。府君取蔬五錢。授以楮幣十倍。曰。汝當以餘錢裨我。糶者笑曰。吾安有餘錢邪。府君曰。汝第持去。俟錢多歸我。不汝急也。其意實予之。而不欲其知。皆此類。凡負販者必多給其直。家人怪問其故。府君曰。彼胼肩繭足。以求升合利。吾忍與之較邪。歲丙申。常熟凶民來依者數十輩。府君僦舍館而食之。癘氣發者相枕籍。府君躬視粥藥而時進之。卒賴以生。府君晚喜浮屠言。讀其書。豁然若會其意者。復閱北溪陳氏性理字義。卽解其要。曰。聖賢之學。蓋如是。因戒其二子懋。莊曰。我少不學。至老而始悔。若等其勉之。二子服父訓。刻志事學。莊入國朝。蔚爲名儒。從典簿陸禮部員外郎。府君及見之。曰。吾有望矣。洪武乙卯九月。府君得疾。恐念慮或亂。畫紙爲圓圈。揭屏閒。常目之。二十七日。卒於家。卒前一日。楚府伴讀陳子晟等道過府君。將之京。問府君欲何言。府君以兩手加額曰。語吾兒莊。努力供職。報天子恩。我死當不恨。享年八十有四。莊在禮部。累請封於朝。未報。卒後月餘。贈將仕佐郎。禮部員外郎。娶蔣氏。贈安人。事舅姑如府君之孝。舅姑或怒。則率子女羅拜於前。曰。新婦誠可怒。願念諸孫。貸其罪。舅姑意不解。悲請至再三。乃

已年七十三。先九年卒。是歲十月二十五日。葬於吳縣橫山梅家灣之原。與安入合兆。男二人。卽懋。莊。女三人。一夭。二適某某。孫四人。紹緒。紳某。曾孫男二人。某女一人。府君歿之明年。莊自員外郎拜福建等處承宣布政司左參政。階通奉大夫。於法當得加贈云者。嗚呼。孝者。天下之大經也。一鄉得孝子焉。則一鄉睦。一邑得孝子焉。則一邑順。一郡得孝子焉。則一郡治。此無他人之所秉恆性。固未始有殊。爾移風易俗之道。蓋莫急於此也。然而孝行之至。心與天通。章布之士。往往能感於神明。發於祥徵。載諸史牒。復有不可誣者。今府君不自有身。唯欲其親之安。剖股愈疾。罔人之所難。至於羹未華時。而能獲實者三。非神明陰相之。未必能致。斯則心與天通之驗也。在宋之初。貴池有孝子者。曰葉蒼。秋九月。母有渴疾。思生李食之。蒼號泣樹下。忽叢葉中得雙李如彈丸。人以爲孝感。府君之事。寧不與蒼類耶。蒼之名尙傳於今。而弗泯。則夫府君者。其不當有傳耶。茲銘之所由作也。銘曰。

維孝之德。是謂天經。秉厥恆性。體順達誠。有美孝子。醇懿是循。但知有親。遑恤其身。親病在寢。子兮吟呻。稽顙於庭。籲彼百神。我命弗顧。體肉何恤。親年可延。我志則擇。求羹大澤。悲啼欲暗。豈意未華。獲實者三。天鑒哀衷。顯厥祥徵。揚之邇遐。聲光騰騰。卓行若茲。亦足不朽。況其立心。一歸忠厚。推仁惠窮。日惟孜孜。吾分當然。奚求人知。施德不食。其子維良。上簡帝心。參預審方。勒石幽宮。文不妄飾。此孝子墳。過者宣式。故中順大夫北平等處提刑按察司副使吳府君墓誌銘。

府君諱彤。字文明。姓吳氏。世爲臨川人。穎異。越常流。從虞學士集。危左丞素學。二公深相器重。應書鄉闈。

弗獲選去補江西行省理問所令史益種學績文不倦夜以繼日遂擢至正丁亥進士第授贛州路錄事階將仕郎時郡守二皆朝廷重臣苛察繳繞察見淵魚僚屬重足而立莫敢仰視府君以事至府數與之抗辨氣凜凜不回撓初甚怒罵已而反賢之贛俗泥堪輿家說有踰半世不葬其親者府君召父老諭之曲盡倫理不兩月間葬者以千數民家子女咸學浮屠法揚言備然坐脫無知氓競奔湊之府君坐以左道上官持不可府君謂其母曰吾聞坐逝者必焚其身以收舍利約以明日行火母亟來謝曰女幸生矣人告妻弟奪其金條脫者絕無左驗府君陽令中析之告者欣然謝去妻之弟獨灑泣不輟乃杖告者而與泣者衆以爲神朱甲與湯乙仇抵爲盜自刺妻實之官捕湯煨治竟誣伏府君察其色有冤以計紿朱妻出所刺刀其血猶在遂縱湯而罪朱劉漢銜李敬甫無以快其忿搆其集衆攘己貲府君得其情往白守守怒令易辭府君不從更以他吏成案戮李於市當刑之日雷震守廳事吏尋爲厲所困自刎死郡兵暴橫虐諸民府君每直之守寢不悅民怨羣起而逐之因擁府君爲守府君曰擅廢置二千石者族汝曹聽我言當迎守還不然吾決不從汝族也衆皆潰去越翼日復聚城外鼓譟焚廬舍爲亂府君請守出共帥壯丁趨火獲造謀者梟其首餘寘不問一郡帖然時營國公火你赤出鎮江西三品以下得專封拜功狀上署府君爲郡治中實超四階至正戊戌僞漢兵圍城踰三月府君調度供億無闕及勢盛慷慨自誓躍馬欲觸鬪民爭擁不得前城陷僞漢奇其才令軍中有生獲吳治中予百金府君被執命釋而官之竟以謀脫歸臨川遜匿崑谷日以奉母爲樂若將終身焉郡旣入職方守臣侯至善力薦起之乙巳秋七月

拜國子博士。成均初設，其建立規制及銓選祠祭之事，府君皆與聞，贊決者甚衆。丙午春正月，轉同知嚴州府事。浙江猶未下，曹國公李文忠方議征進，府君轉輸餉至軍前，公以能稱之。吳元年丁未，召還南京，與蔡林諸老共議卽位郊祀儀注。洪武戊申春正月，擢僉湖廣等處提刑按察司事。階奉議大夫。三月至官，分部荆襄。上疏言五事，鑄降諸處印，沙汰荊州湖泊官，省武昌等處批驗所，復荆峽，二州田額，均石首、公安、江陵、三縣水夫科繇。秋七年，又上疏言興學置安陸驛傳輪役遞運船，及給鑄錢諸物價等事，上皆從之。己酉秋九月，改僉山東提刑按察司事。庚戌夏四月，以東昌土曠人稀，請省博平、清平、夏津、朝城、館陶、觀城、范、七縣。秋七月，超拜中順大夫、北平等處提刑按察司副使，薦剡人才，唯恐失之。兩考北平鄉試，而得士爲尤多。癸丑春三月，奉旨還京，值疾作而終。夏四月二十又九日也。享年五十又七。曾大父某，大父某，父輔，有恩在州里，稱爲惠人。母蔡氏，元配胡氏，前十五年卒。繼室彭氏，子男四：吉祥、勝安，皆夭。唯林童，耆齡，存女八，已亡其五。長適胡中，胡氏之兄之子也。次適太常掾施興嗣，幼在室，生平撰述甚多。有弱齡壯遊，山居南游，金蘭五彙，藏於家。初，府君既歿，興嗣以其子幼，乃來京師，請熊參軍鼎狀其羣行，徵予爲之銘。其致辭，悽以悲，予惻然諾之。未及爲，而興嗣歿。方懼吾文無所授，而胡中又謁厥來，請辭，如興嗣而有加焉。遂以畀之。府君權厝京師南門外，中乃奉其柩歸，將以某年月日葬臨川縣之赤岵山，并持興嗣之骨，還付於其家。中亦可謂義士也已。予聞祭統有云：銘者，論著其先祖之有德善功烈，勤勞慶賞，聲名列於天下，蓋孝子慈孫之所欲得者也。今不敢廢茲義，序而銘諸，庶慰府君於九泉之下，使興嗣有

知亦將無所憾矣。銘曰。

彪蔚炳煥。文何彰耶。剗兇燭姦。政何良耶。動合矩度。行何方耶。位之欲昌。而底於亡耶。松摧柏焚。孰知其爲棟爲梁耶。神理冥茫。胡可以測量耶。四尺之墳。帖山之陽。有永其藏。慎毋壞傷。

故懷遠大將軍同知鷹揚衛親軍指揮使司事于君墓誌銘

惟于氏遠有世序。多以文學爲業。族居南康之都昌。至君益顯融於時。大父德仲。贈明威將軍。某衛親軍指揮使司副使。上騎都尉。追封河南郡伯。大母王氏。追封河南郡君。父祥英。贈懷遠大將軍。同知鷹揚衛親軍指揮使司事。輕車都尉。追封河南郡侯。母余妙真。封河南郡太夫人。君幼知讀書。通大義。縉紳先生稱之。旣長。磊落有大志。不屑爲變情徇勢之行。會元政大亂。天下兵動。江東西化爲盜區。分專徐壽輝建僞號曰宋。都九江。使其將張福夏彰據湖口。元將三旦八駐師鄱陽。都昌適當其衝要。交互殺掠。民俛偃不知所從。君召父老子弟謂曰。吾等皆良民。順寇兵。官軍以爲叛。從官軍則寇兵又將屠我。行見無噍類矣。其計安出。父老子弟咸叩頭曰。微君不能生我。君乃集諸少年趨健者。列爲隊伍。朝暮教以擊刺之法。旬月閒整整可用。乃握劍坐庭中。下令曰。賊兵有入吾境。共擊之。不用命者斬。衆皆股栗。賊聞不敢犯。同列有忌君能者。數潛通構害君。皆先機而梟其首。人以爲神。歲乙未。徐兵破鄱陽。君之勢遂孤。都昌繼陷。徐聞君名。急搜訪。獲之。命爲江東宣尉元帥。鎮鄱陽。歲庚子。徐之柄臣陳友諒殺徐而自立。更僞號曰漢。君乃泣曰。我與陳皆徐君之臣。陳不道乃爾。我可北面而事之邪。當是時。皇上龍飛臨濠。定鼎建業。豪傑

之士爭相奔走。君遣使者奉幣以浮梁降。上悅而受之。君輕騎謁上於龍江。詔宰相燕饗之。禮意優渥。賜以金鵬頂帽暨錦袍一襲。授通議大夫。行樞密院判官。戍徽州永平翼。遣之鎮。行十里所。復趣還。解金連環并繼授之。且曰：「予賜卿冠衣不可少此。」故又召卿來爾。君感知遇之深。誓殫報効。上疏曰：「于光之心。鞠躬盡力。報國一忠。死而後已。上命左右藏器曰：『此于光誓書也。』君察僞漢國政不一。兵出於外。潛獻搗虛之策。上親征九江。君與郡將皆從。颺行電疾。友諒以爲自天而下。棄城宵遁。君將兵下黃梅。瑞昌諸邑。居亡何。助攻建昌。拔之。出戍鄱陽。友諒攻洪都。上親往救。大戰彭蠡湖。友諒斃於流矢。其子理假息武昌。詔常忠武王追攻之。理逾輿。櫛銜壁出降。君皆在行中。與有功焉。轉同知振武衛親軍指揮使司事。遷鷹揚衛。進階懷遠大將軍。時僞吳張士誠據浙西淮東數州之地。君從大將軍徐魏公往討。秦興、高郵、淮安、安豐皆下。張之勁卒皆聚湖之舊館。魏公督諸將及君破之。遂平湖州。下姑蘇。士誠就擒。及魏公征中原。君統銳兵以從。益都、沂、棣、登、萊諸州次第平。乃入汴梁。克洛、陝。攻下潼關。君與郭將軍守之。元將王左丞自河中帥衆來奪關。兩兵方挾戰。君舞戟橫貫其中。大呼殺入。元兵奔潰。追斬之。積屍盈野。越六月。進擊河中。拔其城。魏公命戍鞏昌。元將擴廓帖木兒屢引兵來戰。君輒搗走之。敵兵不敢東向。遂合諸部兵圍安定州。君急分兵往救。兵少不能戰。退屯三十里。復與元別軍會。君腹背皆受攻。遂被執。百計誘其降。不屈。韓將軍戍蘭州。元兵來圍城。擁君行城下。使誘將軍降。君呼曰：「我不幸被縛。誓死不辱國。爾輩受本朝皇帝厚恩。當堅守以俟大軍之至。勿信其甘言所誘也。」元兵大怒。批其頰。擁之使去。尋聞被害。上悼之。錫以

布帛令其家成服行喪。遣祠部官祭以少牢。奉其神主配享雞籠山功臣廟中。君諱光字大用。于其姓也。自二十五歲起兵。至四十三而歿。氣貌修整。善鼓琴。能吟古今體詩。多古雅不凡。兼通醫學。針灸科人望之。翩然貴介公子也。及持戟上馬。輒鷹揚虎視。所向不敢當。逢者莫不改容。太夫人性剛嚴。君事之孜孜盡禮。唯恐稍違其意。遇氣有未平。君長跪於前。移時不敢起。君子尤稱焉。娶鄱陽劉淑姬。通書史。封河南郡夫人。子男二人。蕃與宣也。君生於天歷戊辰九月十四日。歿於洪武庚戌某月日。則不可復知矣。辛亥某月日。蕃用招魂禮。葬君衣冠於某山之原。前葬一月。其外舅建德令劉君燦。狀君之行。引蕃來拜於庭。請爲銘。揭諸墓門。嗟夫。君以一書生嬰亂世。乃能倡義旅。以捍鄉邦。繼而率衆歸有道之朝。四方征伐爲前鋒。幕府上其功。殆無虛歲。惜乎安定之役。孤軍深入。不能制勝。遂致陷於虎口。天乎命耶。有識者蓋悲之也。然君能執節不回。視死猶生。卒不負誓書死而後已之言。亦可謂夷險一節者矣。銘曰。

麟之師。鳳之儀。儀治世之奇。有力如虎。長戟勁弩。才堪用武。惟君之生。丁時搶攘。六合虎爭。投筆而起。集厥師旅。以障州里。真龍天飛。聖朝赫熙。杖劍來依。帝曰嗟汝。爾鎮欽土。以安黎庶。大軍長驅。何戰不捷。翦漢傳吳。借籌決勝。山東受令。洛汭亦定。潼關置屯。鑄鐵爲關。敵不敢捫。靈旗西伐。如火烈烈。所向皆捷。多寡勢殊。視敵如無。卒捐厥軀。赤心如日。以身殉國。死又何恤。皇龍有輝。少牢祭之。餼食崇祠。寰宇一統。不爲麟鳳。使人增慟。冠衣具存。大招爾魂。藏之山樊。山氣鬱鬱。護此幽室。魂兮來宅。

元贈武略將軍同知臨洮府事武騎尉追封滎陽縣男朱府君墓誌銘

府君諱珪。字子厚。姓朱氏。其先出於唐同鳳閣鸞臺平章事敬則之裔。敬則居亳之永城。世以孝義被旌顯。一門六闕相望。而子孫尤貴富。邦人慕豔。有金頭公、銀頭公之號。兩族序昭穆而葬。占地百餘畝。亦曰宰相林。則當時簪笏蟬聯。朱紫赫絕。可知矣。世遠譜廢。子孫分適他州。莫能究其詳。府君銀頭公之後也。五世祖某。宋建炎初。扈蹕南渡。寓於霍丘。仍以貲雄於時。曾祖某。通判淮安州。祖某。提點壽春府稅課司。遂居壽春之下蔡。父某。咸淳末。嘗舉進士。未及官而宋亡。入元以儒入仕。授無爲州學正。母胡氏。府君幼不好弄。巖然如老成人。及長。莘莘嗜學。求名講師而事之。知解既至。不欲陷於一曲。凡天官地理卜筮醫學之屬。咸究其絃旨。晚而學易。陰陽消長之理。吉凶存亡之故。觀象玩辭。使心與理相涵。無少爽者。終日默坐。視流俗紛紜。絕不與競。人以爲迂。則笑曰。主靜乃吾學也。鄉鄰有鬪者。諭以訟終凶之義。釋然而去。若不能凶。喪及無食與衣者。竭其力周之。自奉甚儉。一豆一簞。猶不盡食。事繼母張氏如親母。惟恐有毫髮違其意。令聲流聞。莫不高府君之行。郡國將辟起之。不聽。部使者行縣。又以茂材舉。河南行中書遂署安豐路儒學正。府君曰。與其身有虛名。孰若心無慚德。辭不赴。鄉子弟擔簦從之游。日談道德仁義。刮摩其故習。壘壘數千言。弗倦。暇則鼓琴咏詩以自娛。或時出佳山水閒。獻歌忘返。壽始五十。以延祐戊午秋九月某日終於家。以某年月日葬於縣西孤山祖塋之左。娶劉氏。子男三人。曰某。曰某。曰復。女一人。適某。元季。府君以復貴。贈同知臨洮府事。階武略將軍。勳武騎尉。爵滎陽縣男。劉氏贈滎陽縣君。入我國朝。河南山東相繼降。復例遷京師。有薦其文學於上者。得召見。擢國子助教。侍經親王。陞燕府參軍。轉長史。

予時忝職禁林。兼青宮贊善。日與復游。復凝重醇慤。有儒者氣象。予甚重之。會予蒙恩歸田。復持燕相府錄事楊哲之狀。求銘府君墓。哲序事精膽。且矜然有奇氣。於是粗加藥括。而繫之以銘。銘曰。水若有源。長流弗虧。豈無潢汙。朝滿夕除。猗歟府君。遠有世序。邦人豔之。綿延響組。嗜書不厭。幾欲成癖。晚而潛心。我學吾易。觀易玩辭。孰出範圍。參諸天人。或驗事爲。發聞於時。郡國交辟。有儒一官。可泚其職。靡身下列。揖拜上官。豈若肥遯。白雲青山。令子既顯。褒贈攸宜。九泉冥冥。赫其有輝。況今遭逢。六合重熙。龍光下被。行當見之。孤山鬱蒼。中有元堂。太史勒銘。永固其藏。

故東吳先生吳公墓誌銘

惟吳氏初自延陵而分。圖譜之局廢。不能詳其爵里世次。五季末有諱嗣者。自廣信遷撫之金溪。其諸孫宋含光尉邦基生郇。從象山陸文安公傳道德性命之學。郇生福州教授行世。行世生太學進士益。益生鄉貢進士饒。潛貢進士可。景定甲子進士名揚。兄弟並以文鳴。可生泰連。泰連生儼。儼禮字明善。世稱爲東吳先生。自幼以續承家學爲事。雞初號輒起。乘火挾冊而讀之。時建昌江公存禮。謝公升孫。皆前進士。先生負笈從之游。繼登鄉先達虞文靖公集之門。於是博極羣書。其學絕出於四方。先是元至正甲申。先生伯兄儼與其子裕。同舉進士。裕連三薦。始擢辛卯進士第。名在第二。冠南士之首。及至丙申。先生暨再從弟立。盛又薦於鄉。立。饒之孫。盛。名揚之孫也。鄉人榮之。指先生之居相語曰。是家在前朝。以明經詞賦知名者。先後相望。今復如斯。書詩之澤。厥有衍哉。會海內兵起。先生逸無意北上。下帷講授。遐邇學徒爭

奔走其門。先生隨其資器。孳孳訓迪。必使優柔厭飲而後已。凡所敷釋。皆五經奧義。不拘泥於箋記。而大旨自暢。晚尤專心於春秋。且謂聖人之經一。而諸家異傳。大道榛塞。職此之由。乃著三書。曰禕傳。曰類編。曰五倫辨。辭義嚴密。多先儒所未言。嘗撫卷嘆曰。此書吾積學之所致。後世有揚子雲。其將好之矣。然於文辭尤豐贍有力。下筆之頃。思如湧泉。開闔抑揚。不愆矩度。論者謂如晴樹出雲。氣勢突兀。不假雕琢。天然成章。先生則曰。作文不原於聖經。不關於世教。雖工無益也。先生涵養既深。造詣益殊。其於律己之功。莊愨而端嚴。隆寒極暑。必正衣冠而坐。家人聞其警效。輒肅容而立。不敢妄動。天性篤於孝友。事二親唯恐違其意。季弟偉。早夭。其室周氏。方少。子衷。僅五歲。先生經營其家。撫衷至成人。周氏得以遂其節。先生爲人。剛直自將。巽懦者不侮。驢獯者不畏。或以非理來撓。必峻言折之。其人悻悻見於色。弗少顧。稍知感悔。卽遇之如初。有寸善。播揚唯恐不聞。壬辰之夏。縣燬於寇。所在惡少年。持白挺相撻爲亂。先生椎牛釀酒。集里中耄倪。諭以禍福。皆稽首聽命。他鄉爲亂者。皆罹草薶禽獮之慘。或無子遺。獨先生之鄉獲免。及入國朝。撫州守侯君元善聞先生名。欲聘起之。先生以疾力辭。洪武庚戌。江西鄉闈試多士。府判官王黻。夢州城中迎狀元。旣而先生之子伯宗。實在首選。明年辛亥。對策大廷。復以第一人賜進士。及第。召見奉天殿。授承直郎。禮部員外郎。或者以夢之前徵爲先生世科之符。而先生已歿不及見矣。先生之歿。在辛亥二月二十八日。上距所生大德丁未之歲。得年六十有五。配何氏。生丈夫子三人。長卽伯宗。初名祐。今以字行。次禴。次祈。皆以經術教授州里。女三人。曾雅。周禮。黃顯。其婿也。孫男一人。某。女三人。尙幼。初。伯宗

會試南宮。予嘗奉勅與考試事。伯宗因來謁。以先生文集序爲請。予未暇爲。而先生訃音至矣。伯宗乃泣拜。求撰墓文。將還。以其年某月日葬。里之毬場山。且勒文懸繚之碑。予聞世之右族。重珪疊組者有之矣。索其家學相承。數世而弗墜。十百之中。或一二見焉。況夫科名。尤造物者之所靳哉。今先生之門。何其奕葉聯輝。至於如是也。此無他。山厚則木繁。海深則川聚。其亦理勢之必然耶。自時厥後。繼繼繩繩。予知未有艾也。雖然。先生之學。則又在乎科目之外。經不可不窮也。德不可不修也。業不可不廣也。欲法先生者。法此足矣。是宜銘。銘曰。

吳氏之裔。何蟬聯兮。科名接武。代多賢兮。先生承之。志益奮兮。嚙嚙道腴。涉幽元兮。袞袞法嚴。聖有經兮。傳者角立。分戶庭兮。我隕至隱。發精明兮。剔抉浮翳。朗日星兮。窮經致用。時則屯兮。薛衣椒冠。甘隱淪兮。振揚教鐸。粵乃文兮。膺其天衷。德潤身兮。世降俗偷。病逾深兮。方倚俞盧。起痼沈兮。祕其正陽。平羣陰兮。儒行之卓。罔弗欽兮。一鑑之亡。我心傷兮。其人雖逝。名則良兮。有寧一宮。氣鬱藏兮。焯德著美。薦以石章兮。

義烏王府君墓誌銘

烏傷溪上有王府君者。壽五十八。以洪武九年夏五月丁巳卒於家。十年春三月壬申。葬於同義鄉下澤山之原。素服而臨葬者千有餘人。皆灑涕而去。蓋府君忠厚君子也。諱順。字性之。自幼嗜學。嘗登許文懿公之門。讀書必欲見之躬行。使物被其澤。里有大鼓湖瀦水。灌田五十畝。有奇。歲久岸且崩。天稍不雨。田

咸作龜兆。圻民遑遑不自寧。府君嘆曰：此非我之責耶！卽集衆興築之。約田而輸。作有差。自出布錢。鑿石作水門。視時盜乾而畜洩之。民得大利。朝廷營建宮室。徵木石之工於郡縣。縣吏胥並緣爲姦利。不問老幼廢疾之不可任。悉上其名。索之弗得。輒捕比鄰以代。雞犬不得寧。府君白於縣。覈實而作新籍。凡有徵發。按籍輸役之。村疇之中。痒疴疾痛者。急不能注善藥。府君儲峙一室。或有求者。施之無吝色。然恐察之不精。且與名士朱君震亨講切內經之說。汲汲以濟人爲務。鄉閭有單窶者。出粟菽相貸而不錄其息。沒則給樸藿之。逋錢久不能庚。則焚其券。府君猶以爲未足。復謂移風易俗。必本於學。乃建書塾。招良師。會鄉族俊秀。俾子弟與之共學。甚貧者。輒周以差服。月且十五日。具觴豆延其父兄。列坐左右。立諸生於堂下。府君正衣冠中居。以孝弟睦嫺之道。誘掖而飭導之。縣大夫賢其爲人。顧左右曰：若王性之者。豈非一鄉之善士哉！凡持牒來訴。有及婚姻貨產者。下府君調解之。人服其公。取決片言之閒。不復重有辭。田賦移易不常。官欲重輯之。以定科繇。同義一鄉。府君實與鈎校之任。積弊盡削。無敢上下其手者。府君遂欲進均役之策。會病卒。乃止。縣大夫聞之。頓足曰：良士亡矣。奈何！太息者久之。府君性樂易。未嘗有憂色。見人爲一善事。喜動容貌。每行鄉飲酒禮。捧國朝律。實几案閒。諄諄爲人講解。使之心領神會。不敢爲非。閒居無事。焚香鼓琴。以自樂。四方賢士。無不願與之交。有納交者。雖久留而不厭。好法書名畫。不翅金玉。然頗沛流離。亦挾以俱往。通周易。有所謀爲。則必揲著玩占。所言吉凶多驗。曾祖益之。宋季爲越之校官。祖文繼。父栖。妣曾。朱二氏。妻凡三娶。諸助。何璉。皆先卒。今惟朱氏存。子男子三。演。盜。瀆。子女子三。諸宗。陳。

亨、吳童、其壻也。孫男五，至淑、至剛、至和、至誠、至隆。孫女四，皆在室。府君既葬之六月，演請同縣宗潤集其行爲書一通，介學子童徽來謁文。古者族則有師，閭則有胥，各掌其戒令教治，屬民讀邦法，而書其孝弟睦嫻有學者，校登夫家衆寡，辨其老幼廢疾之可任者。至於役國事，相葬埋之事，無不備極其情意。嗚呼！府君之行，何其甚類之。使一里得府君焉，則一里寧；一鄉得府君焉，則一鄉治；一邑得府君焉，則一邑之民咸得其所矣。視彼剝蝕於人，扼其喉而盪其腦者，抑何遠哉！不可以不銘也。其詞曰：

位不冠纓而惠孚於民，仁矣哉！若人，是非紛紜而折以片言，信矣哉！若人，文質彬彬而令譽振振。君子哉！若人，銘以昭之，揭於墓門。

義烏方府君墓誌銘

府君諱天瑞，字景雲，姓方氏。宋元豐間有諱沈者，自嚴陵白雲原徙居義烏之稠巖，今九世矣。當五世時，又有諱應龍者，登嘉定癸未進士第，官終大治丞，其族望嘗顯矣。府君曾祖諱淵，祖諱菘之，父諱汝霖，母喻氏。紹興丁丑進士工部郎中喻公良能五世孫也。府君六歲時，與羣兒戲於池濱，一兒俯身攀藕花，忽墮水中，羣兒皆驚奔。府君急執其足，揚聲大呼，人聞而來，抱兒還其父，逮長，讀書窮旨趣，孳孳弗少懈。其父以食指之繁，故廬迫隘，不足以容，別買宅一區於三里外，命府君居之。府君昏定晨省，雖大暑寒不廢。父母憐其勤，力止之。府君跪對曰：子職當如是，不爲勞也。府君之配曰朱氏，承直郎廣德路總管府經歷諱約之女也。府君相敬如賓，終其身無片言乖戾。或者媿之梁伯鸞，朱歿，府君一念之輒垂涕，與人交，重

然諾一旦暴風疾雨。府君擔簞躡屨。倉皇欲就途。家人謂曰。非有至急之故。何遽往也。府君笑曰。吾與人期。不欲爽信耳。其遇宗族內外姻。多煦煦有恩意。有稱貸者。或不能償。實不問。府君長身鶴立。美鬚髯。樂賓友。過從。當酒酣耳熱。高談雄辨。驚動四筵。徐而察之。皆根據經史。出人思慮之所不到。時論多之。府君有兄二人。孟曰天與。字景賢。仲曰天錫。字景範。景賢博通書傳。善滑稽。士無賢不肖。皆樂與游。尤精黃帝內經之學。有疾者恆依之。景範淵深而簡默。遇勝友論詩。輒抵掌劇辨。滾滾如泉源發。不見其窮。府君固難爲弟矣。亦復翹然與之抗衡。非聰明絕倫不能也。府君年七十九。疾病頗侵凌。知其不可治。乃絕醫。賦詩一章示子孫。大意以爲吾讀孔氏書。死生終始之說。粗若知之。萬事悠悠。當同一夢。彼浮屠氏所謂天堂地獄。不過託是化爲善而已。吾家素絕之。不必用也。今死矣。與明月清風。浮游於天地間耳。尙何道哉。書畢而終。實洪武九年十一月二十一日也。府君生平嗜吟。有詩集二卷。藏於家。妻卽朱氏。無子而先卒。鞠景賢次子樵爲嗣。旣而少房馬氏生子男子二人。曰士龍。曰士信。子女子一人。曰丑姬。徵事郎。中書舍人。宋璉其壻也。孫男二人。某某。以某年月日葬某山之原。初。予與府君二兄交甚洽。繼識府君於白麟溪。上府君方爲女擇配。予兒璉始九歲。操觚作蠅頭細字。謄於所造文辭。府君心悅。遂成婚姻家。府君嘗有疾時。璉將來南京省余。往謁府君道別。府君執璉臂言曰。汝尊公當代文士第一流。吾旦暮死。不復與子相見。願爲求墓上之銘足矣。璉泣而別。未幾。果以訃聞。予亦爲泣下霑襟。今予致政還家。府君從孫衡備書其事。行。士龍持以來請。予惡得不爲之銘。銘曰。

桐巖陽三鳳翔。一鳳後逝雲爲鄉。梧桐華華空高岡。緬懷德輝人可忘。

故灑峯先生府君墓誌銘

大江之西南昌名郡。有灑峯先生。其學以聖賢爲宗。其文以理氣爲主。其行以忠信爲本。其接人以明體。適用爲教。其生也。人尊之師之。其歿也。人又哀之慕之。歿後二十一年。而門人弟子與其孤翰林修撰善圖。其不朽者甚悉。乃集羣行成書。而以銘文屬筆於濂。濂竊聞先生多著書。大批研精易禮之學。而及於邵子先天。橫渠正蒙諸書。共若干萬言。先生之言曰。先天之學。心學也。其圖皆從中起。其前無古。而後無今。大之爲天地。小之爲民物。顯之爲禮樂。幽之爲鬼神。遠之爲閩關之初終。近之爲瞬息之起止。莫不具焉。邵子以命世人豪。乃探是圖。著爲皇極經世書。性命物理之說。重明於世。學者往往厭其難。棄而弗講。予於是。有經世書說。張子正蒙書實與太極圖通書西銘並傳。而未有爲之註釋者。余於是。有正蒙書說。禮經殘缺已久。朱子雖定爲儀禮經傳。而其輯錄。多出於門人勉齋黃氏與信齋楊氏。其中予奪。多有未定。余於是。有禮說。易之爲書。廣大悉備。伊洛大儒。雖嘗論著。而其義皆愈索而愈無窮。予於是。有易說。吾道不行於時。而其見於言者。不過如此而已。嗚呼。觀先生之言。則其心之所存者。從可知矣。濂雖不文。敢不大書揭於墓道。以爲後進之觀云。按狀。先生諱隱老。字子方。始朱氏。南昌之豐城人。曾祖某。祖三德。父應岳。母楊氏。先生自幼輒勸書。須臾不少怠。母若兄。頗以爲迂。靳膏油不多給。秋宵月朗。每挾冊映讀之。冬則拾枯薪。及燕松明以繼。欣然若忘其憂。時江村姚公某。泳齋洪公某。列泉趙公某。皆宋之遺老。淹通。

六藝之故而桂莊涂公應雷。又遠承考亭朱子遺緒。先生咸執經叩請。莫不交與之。且曰。朱生。令器也。他日所成。當無讓古人。負笈而歸。兄以先生不事生產作業。力求析爨。先生不得已。悉以美田與之。自取不毛者。由是家寔貧。或憐之。勸其俯就科目。庶得祿爲親養。一踐場屋。不中。益潛心於聖賢之祕。窮索於經。驗諸身心。唯恐有不合者。久之。心與理涵。瞭然如辨黑白。遂倡鳴道學於荷山之陽。四方學子。悉從之遊。先生顏貌嚴毅。若不可親近。設有疑問。如撞巨鐘。小大隨應。無虛發者。初。先生伯父曰應五。曰應祥。曰應焱。與其父皆足以師表州里。龐眉白髮。大布寬衣。金春玉撞。塤鳴篪協。使人望之。皓皚之意。消。至是。先生又能繼承之不墜。士論多之。至正壬辰春三月。江淮兵動。鄉之惡少年爲變。殺戮至雞犬。羣倪皆竄匿。先生猶操觚正衣冠而坐。從容語鈔掠者曰。資財任取之。書籍非爾所好也。及其再至。四三至。先生復曰。吾家已罄矣。爾幸他之。盜素聞其名。笑而去。無敢縱火者。西東鄰數十家皆藉是獲完。先生遭時多艱。召族嫗子弟戒之曰。吾宗素以清白相傳。寧寒餓而死。不可爲不義而生。終無敢犯教者。不幸以至正丁酉十月八日卒於家。未歿。語善曰。吾著書多未脫稟。爰繁補闕之責。盡在於汝。吾以數推。明年江西當大變。汝當謹避。以免難。吾今無所苦。精神如常時。但覺氣息漸微。爾已而遂亡。戊戌夏四月。僞漢陳友諒陷南昌。果如先生言。後七年。癸卯十二月初一日。始葬於濡峯之下。娶涂李二氏。男一人。即善。克紹其家學者也。女二人。歸縣人虞淵。鄒誼。孫二人。象環。逢掖。象環通五經大義。年十九前卒。孫女一人。適羅壽。亦里之良族。曾孫一人。與祖。曾孫女二人。尙幼。濂聞君子立心在乎遠且大者。干祿以行志。其澤可被於當時。著書

以明理其功實垂於後世。孰短孰長。人必有辨之者。雖然。人心漓矣。士習陋矣。翻經取題。而媒仕進者有矣。求髣髴如先生者。尙可得耶。銘以昭之。亦發濂之深慨云爾。銘曰。

古之聖哲。何爲作經。牖人天明。使反諸誠。世衰道微。耽厥口耳。搢英撫華。以經爲戲。繽紛外馳。奚補身心。實用瓦礫。棄其南金。考亭奮興。上繼伊洛。完經翼傳。日星照灼。豐城之墟。天產碩儒。豔其流光。漱其芳腴。堂虛露涼。膏油莫續。挾冊於庭。借月而燭。優之柔之。茫然遐思。壓之飫之。如啖甘肥。內存於心。外著於目。明命有赫。無敢不肅。出而倡道。荷山之陽。有聲泱泱。達於四方。執經之徒。雲合川赴。若飲衢尊。充足而去。俗易風移。悼我民彝。天不憖遺。孰不涕洟。元堂沈沈。妥厥靈爽。尙昇後人。胡福是享。

玉龍千戶所管民司長官樓君墓誌銘

嗚呼。吾彥珍其止於斯矣乎。初余年十九。負笈入婺城之南。受經說於聞人先生。會彥珍亦從烏傷來。卒業。余家抵彥珍所居僅半舍。不能一識。至是始及見之。歎如平生。彥珍少余四歲。肌膚若玉雪。服飾鮮潔。容止閒雅。一何貴介公子也。居三年。聞浦陽淵穎吳公闡教諸暨之白門。余復裹糧相從。彥珍知之。騎驢躡余後。越五月卽還。彥珍自是家居。余且讀未見之書於浦陽仙華山。往與還皆經彥珍門。彥珍聞余來。雖夜至一鼓。亦必秉燭起迎。釀酒澆我。軟語不能休。余因就寢席。彥珍則臥余榻側。不解衣。至明方興。及別。送余五里外。訕侮謔笑。無所不至。將行。又復盤旋。若不能遽捨者。時彥珍年方盛壯。論議天下事。若可俯拾。故皆曠闕而疏略。不事簞束。又何跣跣奇才也。已而走燕都。用太師德王之薦。授澧州管領。拔都民。

戶總管府玉龍千戶所管民司長官道里既遠風土嗜好迥然殊。彥珍在官多悒悒不樂。歎曰：人生貴適意耳。何至束縛馳驟如馬牛然。未幾解印綬而歸。不問賓朋有無。無日不露醉。醉輒大笑。世間事類不足以污之。至正中天下大亂。官政苛急如束溼。彥珍益不自膠。賴大放於酒。晨與未盥漱。卽以壺觴自隨。白眼望天。痛飲達暮。唯恐壺口之竭也。家事且日落。彥珍視貲財愈不自愛惜。或勸何不少爲子孫謀。彥珍曰：吾遭時孔艱。託麴孽以爲昏冥之逃耳。君以不念子孫爲責。不亦大感歎。又何曠達之良士也。乙巳春。予自左史乞骸骨還山中。特扶短筇過彥珍。彥珍首不暇冠。急趨前執予手曰：君來歸耶。且留連四三日。勿遽舍我去。指所乘青驢曰：將宰以啖君。池中有大鯉魚。長可三尺。取以爲侑。君雖不飲。視吾引滿亦必爲之暢然。予不能從。後一月有客叩門甚急。使蒼頭詢其姓名。大聲呼曰：汝第言舊日同舍生爾。何必問其爲誰耶。予亟出迎。彥珍已據床危坐。問予曰：予渴甚。汝何處可得美醞。時方嚴酷禁。予不敢答。彥珍攬予髻曰：子誠俗士耶。會日莫不得已。止宿雞第一號。卽馳去。自時厥後。聞彥珍爲酒所蝕。形貌尪瘠甚。未幾竟死焉。臨歿精神耿耿不亂也。嗚呼。吾彥珍其止於斯矣乎。訃至。予不覺失聲慟。會朝廷纂修元史。起予爲總裁官。倉忙就道。不及執紼以視彥珍之葬。輒往酌柩前。追思生平之驢。而話言歷歷在耳。形容則不可復覩矣。嗚呼。吾彥珍其止於斯矣乎。彥珍諱士寶。彥珍其字也。姓樓氏。世居婺之義烏。曾祖贊。祖紹翁。父如浚。妣王氏。彥珍幼孝於親。母夫人抱疾。煨咀劑以進。累數月。目不夜瞑。長從名師友游。發爲聲詩。皆清雅。可傳誦。家素饒於財。姻友或至寒餒。肥馬輕裘與之。無吝色。娶同邑金氏。宋知雷州士龍之曾孫。

女也。內政修舉，無媿於婦道。子男子四，銳、鉞、鍾、鉞。鍾先卒，子女子一，適浦江義門鄭械。孫男二，淙、漸。某年月日生，某年月日卒，享年五十有六。以某年月葬於某鄉某山之原。嗚呼！吾彥珍其止於斯矣乎！銘曰：嗚呼彥珍，死於酒耶，不酒而死，世何多耶！嗚呼彥珍，醉而醒耶，高視陋俗，醒其醉耶！彼溺於聲利，心勦形瘵，而無一隙之適者，方吾彥珍，又何如耶！嗚呼彥珍，孰謂非曠達之士耶！

會稽陳君墓誌銘

監察御史陳煦述其先祖之行，拜且請曰：煦之先本儒族，至於先祖，遭家多艱，始屈身為吏，卓卓有可稱者。先祖父年六十有七，以元至正己亥十二月十八日卒於婺之金華。越一年辛丑正月某日，權厝金華照水里之原。今將以某年月日歸葬會稽某山先隴之次，然先祖之卒，今二十年矣。相去日遠，人之及見先祖者，日益微，稱先祖之美者，當愈疏矣。儻又越十餘年，安復有知而稱之者乎！惟託文辭之傳，可以不朽，而文辭之不美者，又不足以傳。煦嘗聞人咸推先生所爲文必傳，先生文傳，則先祖之事愈久而不墜，惟先生閱焉而賜之銘。余曰：余文豈足傳而祖耶！然而祖之事，信有可稱者，乃受而銘之。君諱克和，字惟中，陳姓，陳爲固始著姓。唐末有遷泉之南安者，宋太常少卿侁始自泉遷會稽。君七世祖也。曾祖一新，文林郎，祖麒，左宣教郎，父德星，母李氏。君六歲喪母，十九而父卒，能自振拔，讀書學法律，挺挺不肯出人下。元貞初，補三江鹽場吏，覈故所積贖，得羨餘數千百引，以代亭戶貧不能輸賦者，流亡相率復還。既而調嵎縣吏，縣民誣鄰人盜其先塋珠，君曰：珠入土必壞，汝先塋葬幾何年矣，豈有完珠耶！富族僞爲券書奪

細民田君辨其券曰。是歲某月改元。何謂正月耶。皆無以應而退。轉吏上虞。會歲饑。民道死相望。君言於令尹。發公藏易粟。勸巨室啓廩賑貸。存活者甚衆。上虞下蓋湖。廣百餘里。既上虞。餘姚。二縣田。夏旱。二縣民爭決水。至相毆擊。君白尹立石表湖上。而中分之。爭遂止。復有梁湖者。溉民田甚博。右族利其腴。將墾以爲田。民病嘆。君浚復之。改平準鈔庫司庫。爲會稽縣吏。紹興路聞君能。辟爲掾。山陰堞隳塘圯。海水禍稼。郡公屬君治。君役多田家。斲巨石穴其中。貫以堅木築之。歲乃有秋。錄事吏闕。君攝其事。樊氏叔姪爭先廬。不決。相訟。前吏利其貲。故緩之。不爲析。君登之於庭。告以古孝弟禮讓事。投鉤於地。使各取之。叔姪悔悟。叩首泣謝。讓其廬。不訟。居踰年。移吏婺州。守熟君名。不敢以吏待君。每相可否論事。民陰受其惠。武義民欲誘飢民爲亂。事覺。欲悉捕誅之。武義大擾。君走告廉訪副使伯嘉。訥曰。謀亂者一狂豎耳。餘人果何罪。今不因而輯定之。亂且見矣。賴以生者三千餘家。義烏徐氏。少年七十餘。剪髮爲信。劫其仇家。既而仇遁。其黨怒。遂火縣治而去。郡議以爲亂。律置之死。君復告伯嘉。訥曰。愚民負氣縱火。罪雖有之。豈如議者之重耶。且剪髮者皆脅從耳。欲置之死。不已酷乎。七十人者皆賴以免。聲績益彰。至正乙未。江浙行中書省以君爲慶元路市舶提舉司都目。戊戌。奉檄使泉。還道婺。會國兵圍城。君隄以出。問道之會稽。遇翦髮民。相率邀致其家。出婦子拜曰。生我者君也。爭具肩輿護君歸。明年之金華。訪其二子敬。升。遂卒。卒時告其子皆善言。聞君卒者。爲之歎息。君爲吏至老。毫毛無所私家。無儻石儲。弗卹也。然遇事敢言。言必當乎理。故所爲輒可稱道。娶呂氏。生五男子。長源。國朝知完縣事。次卽敬。福建行省員外郎。次復。元山陰。

縣儒學教諭。次卽升。今爲儀封縣儒學教諭。其一曰端。出後上虞梁氏女。一適同郡王克常。孫男六人。長卽煦。由太學生爲吳王府伴讀。擢今官。次曰杰。烈。默。熊。孫女五人。古之仕者。將以行道也。非以榮其身也。然而所居卑。則所被者狹。故君子樂得失時位焉。苟幸時竊位以富貴其身。而無所益於世。則君子何取乎。若君者。雖老死於下位。然所至而民受其惠。其過於世之食厚祿而無善可稱者遠矣。使天道可必。君其有後哉。銘曰。

萬鍾無聞。彼爲何人。吁嗟乎君。下位終身。雖則位卑。善政孔殷。誰曰不信。視其子孫。

元隱君子東陽陳公先生鹿皮子墓誌銘

婺之東陽有隱君子。戴華陽巾。裁鹿皮爲衣。種藥銀谷。湖中當春陽正殷。翫落紅於飛花亭上。亭下有流泉。花飛墜泉中。與其相迴旋。良久而去。君子樂之。日往觀弗厭。旣而入太霞洞。著書。其書縱橫辨博。孟軻氏而下。皆未免於論議。元統間。濂嘗候君子洞中。君子步屣出。速坐之。海紅花底。戒侍史治酒。漿瓊醑。親執罍獻酬。歌古詞以爲驩。酒已。君子慨然曰。秦漢而下。說經而善者不傳。傳者多不得其宗。滄熙以來。羣儒之說。尤與洙泗。伊洛不類。余悉屏去。傳注獨取遺經。精思至四十春秋。一旦神會心融。灼見聖賢之大旨。譬猶明月之珠。失之二千年。上自王公。下至。疇隸。無不俛俛日索之。終不可致。牧豎乃獲於大澤之濱。豈可以人賤而并珠弗貴乎。吾今持此以解六經。決然自謂當斷來說於吾後云。濂乃避席而問曰。其意云何。君子曰。吾以九疇爲六府三事。而圖書爲易象者。不可誣。以片言統萬論。而天下古今無疑義。以庸

言釋經子而野人君子無異辭。謂神所知之謂智。知天下殊分之謂禮。知分之宜之謂義。知天地萬物一體之謂仁。禮復則和之謂樂。謂天地萬物一體。經子之會要。一視萬物。則萬殊之分正。家齊國治而天下平矣。濂未達。請復問其詳。君子曰。國家天下一枳也。枳一爾而稷十焉。枳有稷而一視之。其於人則仁也。發而視之。稷有十。則等有十。其於人則君臣父子長幼之等夷。刑賞予奪之殊分。所謂禮也。視十爲十者。禮之異。視十爲一者。仁之同。分愈異則志愈同。禮愈嚴則仁愈篤者。先王之道也。分愈異者。志愈同。故合枳之稷。反求其故地。枚舉而銓次焉者。差之黍銖。則人已無別。犬牙錯而不齊。斂之不合而一。不可見禮愈嚴者。仁愈篤。故治國家天下者。不以禮則彝倫斁。禮樂廢而仁亡。是故洙、泗、伊、洛。朝夕之所陳者。天下萬殊之分。視聽言之宜。所操者禮之柄耳。故學聖人者。必始於禮焉。故一體萬殊者。孔子之一貫於洙、泗、伊、洛之言。無不統者也。理一分殊之義廢。則操其枝葉而舍其本根。洙、泗、伊、洛之會要。不可見。章句析而附會興。遺經不可識矣。濂受其說以歸。聞嘗質之明經者。或者曰。近時學經者。如三尺之童。觀優於臺下。但聞臺上語笑聲。而弗獲見其形。所以不知妍媸。唯人言是信。君子之論偉矣。或者曰。伊、洛之學。大昭於濟熙。未易遽取舍之也。自時厥後。爲貧游仕。奔走於四方。不及再候君子。以畢其說。聞君子益以斯道爲己任。汲汲焉。惟恐不傳。靡晷靡夜。操觚著所見於書。書成。卽梓刻示人。復貽書於濂曰。予瀕死。吾道苦無所授。子聰明絕倫。何不一來。片言可盡也。憂患相仍。亦未及往。而天下日趨於亂。君子之室廬。亦燬於兵。寓子壻王爲家。留六年之久。遭微疾。默坐於一室。不食飲者踰月。縣令遣醫來視疾。君子麾去曰。吾年

八十又八。其死宜矣。何藥之爲。未幾。儻然而逝。實至正乙巳十月戊申也。君子姓陳氏。諱樵。其字爲君采。人因其衣鹿皮。故又號爲鹿皮子。表隱趣也。其先居睦之富春。宋之中葉。來徙東陽太平里。世爲衣冠巨族。曾祖居仁。祖嘉登。仕郎。父取青。國學進士。從鄉先生石公一鼇。與聞考亭之學。有志節。嘗抗章誣權臣。賈似道。誤國。及宋亡。元丞相伯顏見其章。欲用之。辭。君子幼學於家庭。繼受易詩書春秋大義於李公直方。其於天下之書。無不讀。讀無不解。學成而隱。邈然不與世接。唯寤寐羣經。思一洗支離穿鑿之陋。形於說辨。見於文辭。恆懇懇爲人道之。文辭於狀物寫情。尤精。然亦自出機軸。不蹈襲古今遺轍。讀之者以其新逸超麗。喻爲挺立孤松。羣葩俯仰下風。而莫之敢抗。或就之學。則斥曰。後世之辭章。乃士之脂澤。時之清玩耳。舍六經弗講。而事浮辭綺語。何哉。少作古賦十餘篇。傳至成均。生徒競相謄寫。謂絕似魏晉人所撰。君子則諱之。不復肯爲也。君子足跡未嘗出里門。而名聞遠達。朝著知名之士。若虞文靖公集。黃文獻公潛。歐陽文公元。皆慕之。以爲不可及。移書諮訪。如恐失之。性復至孝。父患風痺。君子扶之以行。歲久益勤。後爲風痰所侵。氣弱不能吐。君子截竹爲笛。時吸而出之。母郭夫人歿。君子不見。見其遺衣。輒奉之。嗚而泣。生平未嘗言利。苟非其義。千駟萬鍾。弗爲動。家雖素饒。於貧痛憊。膏粱之習。惡衣菲食。以終其身。遇歲儉。輒竭粟賑里閭。自取來牟。以續其食。嘗發所藏錫爲器。工人持歸。乃白金也。悉易之。或以告君子。君子一笑而已。嗚呼。君子已矣。世豈復有斯人哉。君子所著書曰易象數新說。曰洪範傳。曰經解經。曰四書本旨。曰孝經新說。曰太極圖解。曰通書解。曰聖賢大意。曰性理大明。曰答客問。曰石室新語。曰瀉熙糾

繆曰鹿皮子曰飛花觀小墓合數百卷君子正配朱氏先若干年卒生延年大年耆年喬年昌年大年至正庚寅中鄉闈乙榜第一署徽州路歙縣教諭側室某氏生逢年君子沒時諸子唯喬年在餘皆先卒女三人其婿卽王爲次則俞某張紹先孫男九人庭玉庭珪庭筠庭鸞庭鳳庭堅庭誨庭某庭某女四人適徐信俞本虞某宗某曾孫男五人紹宗超宗林宗某宗某宗女三人在幼喬年庭堅等洎王爲以是年十一月某甲子奉柩葬於縣西南四十里懷德鄉斗潭山之原縣長貳及學士大夫門弟子咸會莫不灑泣葬後五年其高第弟子楊君芾乃爲撰列行狀一通而喬年同王爲持示金華宋濂再拜請爲銘嗚呼君子以超絕之資曠視千古若一旦暮期以孔子爲師而折衷羣言之是非不徇偏曲不尙詭隨必欲暢其已說而後已可謂特立獨行而無畏懼者也非人豪其能之乎雖然淳熙二三大儒其志將以明道也初亦何心於固必使君子生於其時與之上下其論未必無起予之歎而君子之衆說亦或藉其損益以就厥中則所造詣者愈光輝混融而卓冠於後先矣天之生材相遠而不相值每如此竟何如哉然君子措慮之深望道之切其所傳者確然自成一家言殆無疑者世之人弗察伐異黨同常指君子爲過高是豈窺見其衡氣機者哉濂也不敏竊有慕洎伊洛之學有志弗強日就卑近不足以測君子所至之淺深而君子則欲進而教之今因請銘故備述昔日問答之辭於其首後之傳儒林者尙有所稽焉其稱爲君子者君子蓋有德之通稱尊之可謂至矣銘曰

洎泗傳聖髓兮伊洛發遺精
天人旣混合兮陽陰悉苞并
無義聞不開闡兮金石奏和平
自茲益演繹兮

白日中天行。如彼藝黍稷兮。薨去莠與稂。春實成白粲兮。詔使來者嘗有夫。起東海兮。吐言一如鏞。噲咳達幽隱兮。務使聲遠揚。豈欲異塗轍兮。理致無終窮。著書動盈車兮。片言類括囊。中有萬寶玉兮。包絡無遺亡。解之溢衆目兮。懷異吁可驚。似茲海外珍兮。神光燁如虹。苟施琢刻工兮。定可獻明廷。下可奉公侯兮。上可奠方明。胡爲墮空山兮。枯槁埋光晶。鹿皮翦爲裘兮。裘冠贖垂纓。臨流翫飛花兮。心與烟霞冥。清風與逸氣兮。橫絕宇宙中。食道身自腴兮。疇計祿位豐。婆娑太霞洞兮。卒以上壽終。斗潭向東流兮。內有八尺瑩。鬼神必訶衛兮。靈氣結華英。永爲文字祥兮。千祀垂休聲。

寧海林貞婦方氏墓誌銘

寧海林可企。年垂八十。纏綿疾疢。偃臥不能興。召其甥方孝聞而謂之曰。吾耄矣。卽溘先朝露。無所憾。第母氏貞行未及顯白。中心怛怛然。類持杵舂擊之者。聞汝弟孝孺受經於金華宋太史。太史進人以善者也。儻孝孺爲達其誠。太史未必不憫之。而寵畀以文也。言訖涕泗滂然下。孝孺以言予因不辭而序之曰。貞婦諱友弟。姓方氏。亦寧海人。宋某□年進士淦之女。孝聞之曾祖姑也。年二十歸可企之父某。時舅已沒。惟姑存。秋髮亦續紛矣。當科繇之興。黔首藉是以魚肉之。夫獨嬰其難。且無同氣之親以爲助。貞婦俛首事紡磚。或至雞號就枕。由是給使之用不匱。越八載而生四子。夫以一疾亡。長子年甫踰七。餘子生尙幼。貞婦幾欲無生。然恐傷姑之心。強顏追逐。日夜飲泣吞聲。不使聲聞於人。里有豪士欲乘其孤孀。凌之。貞婦盛氣叱曰。我未亡人耳。爾誠君子耶。當恤我軫我之不暇。顧反以相虐耶。苟進進不已。誓直於官以

懲彼繼者。或聞之吐舌。相戒莫敢犯。卒能樹其門弗墜。姑年八十。恆多病。貞婦敬之如鬼神。保之如嬰兒。無毫髮忤其意。及以壽終。帥家人行喪。朝夕奠哭如儀。學禮君子不能過也。訓飭諸子從師問學。束脩不足。脫簪珥繼之。至其成立。皆爲之授室。歲時出坐堂上。子婦與諸孫分東西立階下。次第舉觴爲壽。雍穆之氣。藹如陽春。如是三十年。乃卒。卒時年八十二。某年某月日也。以某年月日葬某山之原。州里之人。至今指其門。相謂曰。是有貞婦。能儼然自守。而致備福之養。今豈復有是人耶。相與慕咏而去。貞婦四子。長可傳。次即可企。次可任。可信。諸孫若干人。某某。孫女若干人。歸濟寧。知府方去矜。及某某。去矜。孝聞父也。子聞夫者。婦之天。天可背乎。背天則非人也。有若貞婦之順乎天。天之報施如此。亦云厚矣哉。銘曰。鴻鴈貞雌。而不再雄。而況於人乎。林氏婦方其始。無愧人道乎。有人心者。孰謂其不能興起乎。

